

I. DISPOSICIÓN XERAIS

MINISTERIO DE AGRICULTURA, ALIMENTACIÓN E MEDIO AMBIENTE

7955 *Real decreto 548/2013, do 19 de xullo, para a aplicación das medidas do programa de apoio 2014-2018 ao sector vitivinícola español.*

O Regulamento (CE) n.º 1234/2007, do 22 de outubro de 2007, polo que se crea unha organización común de mercados agrícolas e se establecen disposicións específicas para determinados produtos agrícolas (Regulamento único para as OCM) e o Regulamento (CE) n.º 555/2008 da Comisión, do 27 de xuño de 2008, polo que se establecen normas de desenvolvemento do Regulamento (CE) n.º 1234/2007 no relativo aos programas de apoio, ao comercio con terceiros países, ao potencial produtivo e aos controis no sector vitivinícola, regulan as disposicións sobre os programas de apoio que os Estados membros deben presentar á Comisión.

O primeiro programa de apoio ao sector vitivinícola español aplicouse en España entre os exercicios 2009 e 2013, a través do Real decreto 244/2009, do 27 de febreiro, para a aplicación das medidas do programa de apoio ao sector vitivinícola español, que regulou as medidas admisibles de promoción de viños en terceiros países, a destilación de alcohol de uso de boca, a reestruturación e reconversión de viñas, a destilación de crise e a destilación de subprodutos.

Así mesmo, o Real decreto 1547/2011, do 31 de outubro, polo que se regula a medida de investimentos recollida no programa de apoio ao sector vitivinícola, estableceu a normativa aplicable á medida de investimentos a partir de 2012, dentro do programa de apoio ao sector vitivinícola español 2009-2013.

O presente real decreto recolle o conxunto de disposicións que desenvolven o programa de apoio do sector vitivinícola español para a aplicación do segundo Programa de apoio quinquenal presentado por España á Comisión Europea para o período 2014 a 2018, continuación do anterior e do cal cabe destacar, como novidades, que se eliminan medidas incluídas no primeiro período quinquenal porque o período de aplicación derivado da normativa comunitaria finalizou en 2012, como son a destilación de alcohol de uso de boca e a destilación de crise, e se inclúen modificacións nas condicións de aplicación das medidas de promoción e de reestruturación e reconversión de viñas resultado de modificacións do Regulamento (CE) n.º 555/2008 da Comisión, do 27 de xuño de 2008, operadas a través do Regulamento de execución (UE) n.º 568/2012 da Comisión, do 28 de xuño de 2012, e do Regulamento de execución (UE) n.º 202/2013 da Comisión, do 8 de marzo de 2013. En consecuencia, unha vez expirada a vixencia do primeiro programa de apoio 2009-2013 e considerando as modificacións indicadas, deben derogarse os citados reais decretos 244/2009, do 27 de febreiro, e 1547/2011, do 31 de outubro.

O presente real decreto dítase tamén en virtude da Lei 24/2003, do 10 de xullo, da viña e do viño, cuxo obxecto é a ordenación básica, no marco da normativa da Unión Europea, da viña e do viño, así como a súa designación, presentación, promoción e publicidade.

Para a promoción de viños en terceiros países desenvólvese o procedemento de aprobación de accións e programas para cada exercicio financeiro, no cal, dentro do marco das súas competencias, participan o Ministerio de Agricultura, Alimentación e Medio Ambiente e as comunidades autónomas, e, no seguimento e avaliación dela, seguirase contando co asesoramento e orientación tanto das organizacións representativas do sector como do ICEX España Exportación e Inversiones.

Neste novo período de programación débese dar prioridade aos programas presentados por novos beneficiarios que non recibisen apoio anteriormente, e aos beneficiarios que, tendo recibido axuda anteriormente, se dirixen a un novo terceiro país.

Ademais, sempre que exista dispoñibilidade orzamentaria suficiente, poderán ser beneficiarios das axudas os organismos públicos con competencia legalmente establecida para desenvolveren actuacións de promoción en mercados de terceiros países e deberán demostrar que a medida se executa de forma evidente.

En materia de reestruturación e reconversión de viña establecéronse requisitos mínimos e condicións que deben ter os plans de reestruturación, así como a duración das medidas e a asignación de fondos ás comunidades autónomas. É conveniente tamén regular os pagamentos de medidas iniciadas pero non pagas no período 2009-2013.

Canto á destilación de subprodutos, fixéronse os montantes de axuda que se pagarán aos destiladores polos subprodutos da vinificación que sexan entregados á destilación e as condicións que se deben cumprir para o cobramento da axuda.

Decidiuse dar apoio de forma exclusiva aos investimentos en instalacións, infraestrutura vinícola e comercialización de viños, mostos e vinagre, así como ao desenvolvemento de novos produtos, procedementos e tecnoloxías, a través do programa de apoio ao sector vitivinícola. É conveniente, por tanto, fixar unha data que evite o duplo financiamento, ao coincidir esta medida cos investimentos que se poden levar a cabo nos programas de desenvolvemento rural financiados polo Feader.

Na xestión desta medida, e dentro do marco das súas competencias, participarán tanto o Ministerio de Agricultura, Alimentación e Medio Ambiente como as comunidades autónomas.

Na elaboración deste real decreto foron consultadas as comunidades autónomas, ben como as entidades máis representativas dos sectores afectados.

Na súa virtude, por proposta do ministro de Agricultura, Alimentación e Medio Ambiente, coa aprobación previa do ministro de Facenda e Administracións Públicas, de acordo co Consello de Estado e logo de deliberación do Consello de Ministros, na súa reunión do día 19 de xullo de 2013,

DISPOÑO:

CAPÍTULO I

Disposicións xerais

Artigo 1. *Obxecto e ámbito de aplicación.*

Este real decreto ten por obxecto establecer a normativa básica aplicable ás seguintes medidas recollidas no Programa de apoio ao sector vitivinícola español 2014-2018, presentado polo Estado español ante a Comisión Europea de conformidade co disposto no Regulamento (CE) n.º 1234/2007 do Consello, do 22 de outubro de 2007, polo que se crea unha organización común de mercados agrícolas e se establecen disposicións específicas para determinados produtos agrícolas (Regulamento único para as OCM), xunto co Regulamento (CE) n.º 555/2008 da Comisión, do 27 de xuño de 2008, polo que se establecen normas de desenvolvemento do Regulamento (CE) n.º 1234/2007 no relativo aos programas de apoio, ao comercio con terceiros países, ao potencial produtivo e aos controis no sector vitivinícola:

- a) Promoción de mercados en terceiros países.
- b) Reestruturación e reconversión de viñas.
- c) Eliminación de subprodutos.
- d) Investimentos.

Artigo 2. *Definicións.*

Para efectos de aplicación do presente real decreto, entenderase como:

a) Autoridade competente: o órgano competente da comunidade autónoma para a tramitación, resolución e pagamento das axudas a que se refire este real decreto, no seu ámbito territorial, e o Fondo Español de Garantía Agraria como organismo pagador na tramitación, control e pagamento das axudas a que se refire este real decreto, no ámbito nacional.

b) Destilador autorizado: toda persoa ou agrupación de persoas que:

1.º Destile viños, viños alcoholizados, subprodutos da vinificación ou de calquera outra transformación de uva, e

2.º Estea autorizada polas autoridades competentes para actuar no marco do artigo 103 terxios do Regulamento (CE) n.º 1234/2007 do Consello, do 22 de outubro de 2007.

c) Titular da viña: a persoa ou agrupación de persoas, con independencia da forma xurídica da agrupación ou dos seus membros, que ten os dereitos de plantación ou replantación sobre o cultivo, quer como consecuencia dun dereito de propiedade quer porque teña atribuído calquera outro dereito de disposición sobre o cultivo.

d) Propietario: a persoa ou agrupación de persoas, con independencia da forma xurídica da agrupación ou dos seus membros, que ten o título de propiedade sobre a parcela onde se encontra a viña.

e) Viticultor ou cultivador: a persoa ou agrupación de persoas, con independencia da forma xurídica da agrupación ou dos seus membros, que obtén o produto anual da viña xa por ser o propietario xa porque ten atribuído un dereito de uso sobre a viña situada no territorio nacional.

f) Parcela de viña: a superficie continua de terreo en que un só viticultor cultiva a vide, formada por un conxunto de recintos cunha ou varias referencias alfanuméricas, representada graficamente no Sistema de información xeográfica de parcelas agrícolas (en diante Sixpac).

g) Produtor: calquera persoa ou agrupación de persoas que produciu viño a partir de uva fresca, de mosto de uva, de mosto de uva parcialmente fermentado ou de viño novo en proceso de fermentación, obtidos por eles mesmos ou comprados, así como calquera persoa ou agrupación de persoas que posúa subprodutos resultantes de calquera transformación de uva distinta da vinificación.

h) Programa: para os efectos da medida de promoción en mercado de terceiros países, considérase programa o conxunto de accións de promoción coherentes que se desenvolvan nun ou en varios terceiros países cuxo alcance sexa suficiente para contribuír a aumentar a información sobre os produtos en cuestión, ben como a súa comercialización.

i) Acción: para efectos da medida de promoción entenderase por acción calquera das medidas de información e promoción determinadas no número 3 do artigo 103 septdecies do Regulamento (CE) n.º 1234/2007 do Consello, do 22 de outubro de 2007, que se recollen no anexo I do presente real decreto.

j) Medida: para os efectos da axuda á reestruturación e reconversión, enténdese como medida o conxunto de operacións tendentes a conseguir a reestruturación e reconversión dunha superficie de viña determinada.

k) Arrinca: a eliminación total de todas as cepas que se encontren nunha superficie plantada de vide. Esta arrinca inclúe a eliminación tanto do portaenxerto como da parte aérea da planta.

l) Operación: para efectos de axuda aos investimentos, enténdese por operación calquera que se defina nos proxectos dos solicitantes que constitúa unha unidade material de execución, cun orzamento definido e data de finalización dentro de cada exercicio Feaga.

m) Empresa vinícola: para os efectos da medida de promoción entenderase por empresa vinícola aquela que elabore e comercialice algún dos produtos mencionados no anexo II deste real decreto.

CAPÍTULO II

Medidas de apoio

Sección 1.ª Promoción en mercados de terceiros países

Artigo 3. *Ámbito de aplicación.*

Co fin de mellorar a competitividade dos viños españois, as medidas de información e de promoción en terceiros países dos produtos que se mencionan no artigo 6 poderán financiarse con cargo ao orzamento comunitario, nas condicións previstas na presente sección.

Artigo 4. *Tipos de accións e duración dos programas.*

1. A medida mencionada no artigo 103 septdecies do Regulamento (CE) n.º 1234/2007 do Consello, do 22 de outubro, poderá incluír calquera das accións e actividades relacionadas no anexo I.

2. As citadas accións deberán levarse a cabo preferentemente no marco dun programa de información e de promoción.

3. Para cada período de programación, os programas poderán ter unha duración máxima de tres anos por beneficiario e país. Non obstante, poderán ser prorrogados por un período non superior a dous anos, logo de solicitude, de acordo co previsto no artigo 8.3.

Artigo 5. *Beneficiarios.*

1. Poderán presentar solicitudes para acollerse ao financiamento das medidas de promoción en terceiros países:

- a) As empresas vinícolas.
- b) As organizacións de produtores e organizacións interprofesionais definidas no artigo 125 sexdecies do Regulamento (CE) n.º 1234/2007 do Consello, do 22 de outubro de 2007.
- c) Os órganos de xestión das denominacións de orixe protexidas e das indicacións xeográficas protexidas de viños.
- d) As asociacións de exportadores e consorcios de exportación, participados exclusivamente por empresas do sector vitivinícola.
- e) As entidades asociativas sen ánimo de lucro participadas exclusivamente por empresas do sector vitivinícola que teñan entre os seus fins a promoción exterior dos viños.
- f) Así mesmo, e en caso de existir suficiente dispoñibilidade de orzamento, após a aprobación dos programas correspondentes aos tipos de beneficiarios antes indicados, poderán considerarse tamén beneficiarios os organismos públicos con competencia legalmente establecida para desenvolveren actuacións de promoción de produtos e mercados en terceiros países.

2. Os beneficiarios deberán demostrar suficiente capacidade técnica e financeira para afrontar as exixencias de comercio cos terceiros países, e medios para aseguraren que a medida se implanta o máis efectivamente posible. Deberán, así mesmo, garantir a dispoñibilidade, en cantidade e calidade, de produtos, para asegurar a resposta fronte ás demandas que se poidan xerar como efecto da promoción realizada.

Artigo 6. *Produtos e países admisibles.*

1. Poderán ser obxecto das medidas de promoción os produtos de calidade destinados ao consumo directo, detallados no anexo II, que contén con posibilidades de exportación ou de novas saídas comerciais en terceiros países e que pertencen a algunha das seguintes categorías:

- a) Viños con denominación de orixe protexida.
- b) Viños con indicación xeográfica protexida.
- c) Viños en que se indique a variedade de uva de vinificación.

2. Considéranse elixibles para realizar medidas de promoción todos os países, e prioritarios os mencionados no anexo III.

Artigo 7. *Características das accións e programas.*

1. As accións e programas estarán claramente definidos e especificarán o país ou países a que se dirixen, os tipos de viños que inclúen, as medidas que se pretenden levar a cabo e os custos estimados de cada unha delas.

2. As accións distribuiranse en períodos de 12 meses que comezarán o 15 de xuño de cada ano.

3. As mensaxes basearanse nas calidades intrínsecas do produto e deberán axustarse á normativa aplicable nos terceiros países a que van destinados.

4. No caso dos viños que contén cunha indicación xeográfica, deberá especificarse a orixe do produto como parte da campaña de información e promoción.

5. Sen prexuízo do disposto nos números 3 e 4, as referencias ás marcas, se for o caso, poderán formar parte da mensaxe.

6. O órgano colexiado previsto no artigo 19, para favorecer a coherencia e eficacia da medida, poderá establecer anualmente directrices sobre as campañas de información e de promoción, que se regularán polo disposto nesta sección.

Artigo 8. *Presentación de solicitudes.*

1. Os interesados que reúnan as condicións previstas no artigo 5 presentarán as súas propostas de accións e programas e a documentación correspondente ante o órgano competente da comunidade autónoma en que se encuentre situado o domicilio fiscal da súa empresa ou organización, directamente ou a través de calquera dos medios previstos no artigo 38.4 da Lei 30/1992, do 26 de novembro, de réxime xurídico das administracións públicas e do procedemento administrativo común, antes do 15 de febreiro de cada ano.

Non obstante, os organismos públicos de ámbito nacional presentarán as solicitudes ante a Dirección Xeral da Industria Alimentaria do Ministerio de Agricultura, Alimentación e Medio Ambiente, a través dos mesmos medios establecidos no número 1.

2. As accións e programas presentados deberán conter, ao menos, a información prevista no anexo IV e:

- a) Cumprir o disposto nesta sección.
- b) Respetar a normativa comunitaria relativa aos produtos considerados e á súa comercialización.
- c) Reflectir co suficiente grao de detalle todos os requisitos necesarios como para que poida avaliarse a súa conformidade coa normativa aplicable e a súa relación calidade/prezo.
- d) Especificar os medios propios ou externos con que se contará para desenvolver as accións previstas.

3. En caso de solicitar prórroga dun programa, de acordo co número 3 do artigo 4, ademais da documentación prevista nos números 1 e 2 do presente artigo, os interesados deberán presentar un informe de resultados dos dous primeiros anos de execución para a

súa avaliación. Este informe conterá, ao menos, información relativa efectos no mercado de destino do programa desenvolvido, ademais de detallar as razóns para solicitar a prórroga.

Artigo 9. Tramitación das solicitudes e avaliación dos programas.

1. As comunidades autónomas ou o Ministerio de Agricultura, Alimentación e Medio Ambiente, segundo o caso, examinarán as solicitudes canto á súa conformidade con esta sección e, se proceder, as directrices elaboradas de acordo co previsto co artigo 7. Así mesmo, requirirán ao solicitante, cando for preciso, a presentación da documentación ou información que se deba emendar, ou da adicional pertinente.

2. De acordo cos criterios establecidos no anexo V, as comunidades autónomas elaborarán unha lista provisoria cos programas seleccionados por orde de puntuación.

3. Excluiranse da lista aqueles programas que non obtivesen ao menos 30 puntos.

4. Consideraranse prioritarios os programas presentados por microempresas e pequenas e medianas empresas, os presentados por novos beneficiarios que non recibisen apoio anteriormente e os presentados por beneficiarios que, tendo recibido axuda anteriormente, se dirixen a un novo terceiro país.

5. As comunidades autónomas remitirán a lista ao Ministerio de Agricultura, Alimentación e Medio Ambiente antes do 15 de abril de cada ano, no formato electrónico, anexo VI, dispoñible na web do Ministerio de Agricultura, Alimentación e Medio Ambiente. Á lista xuntaráse a documentación dos programas seleccionados (copia dos formularios).

Artigo 10. Comisión Nacional de Selección de Programas.

1. No seo da Mesa de Promoción Alimentaria, aprobada na Conferencia Sectorial de Agricultura e Desenvolvemento Rural do 19 de febreiro de 2007 e integrada por representantes do Ministerio de Agricultura, Alimentación e Medio Ambiente e das comunidades autónomas, constituirase unha comisión nacional de selección de programas, que estará presidida polo director xeral da Industria Alimentaria e da cal formarán parte, como vogais, catro representantes do Ministerio de Agricultura, Alimentación e Medio Ambiente designados pola Secretaría Xeral de Agricultura e Alimentación e un representante por cada unha das comunidades autónomas que desexen integrarse.

Actuará como secretario, con voz e voto, un funcionario da Subdirección Xeral de Promoción Alimentaria, designado polo presidente.

Esta comisión será a responsable de elaborar, para cada exercicio Feaga, a lista definitiva das accións e programas para propor á Conferencia Sectorial de Agricultura e Desenvolvemento Rural para a súa aprobación.

2. A lista definitiva elaborárase a partir das listas provisorias remitidas polas comunidades autónomas e, se procede, tendo en conta os seguintes criterios:

- a) A relación calidade/prezo dos programas valorada de acordo co anexo V.
- b) A oportunidade e calidade dos programas e a súa conformidade coas directrices mencionadas no artigo 7 da presente sección.
- c) O interese nacional e comunitario dos programas.
- d) A súa compatibilidade, coherencia e complementariedade coas medidas de promoción que se estean desenvolvendo a nivel nacional ou comunitario.
- e) O incremento previsible da demanda dos produtos considerados, derivado das medidas propostas.
- f) A dispoñibilidade orzamentaria.

3. A Comisión poderá, segundo proceda, propor:

a) Se o gasto total previsto nas solicitudes tramitadas non excede o límite orzamentario inicialmente asignado a esta medida:

1.º A aprobación de todas as solicitudes tramitadas que se axusten á estratexia e ás directrices establecidas, se for este o caso, polo comité previsto no artigo 19.

2.º A aprobación, condicionada á aceptación de certas adaptacións que se axusten á estratexia e directrices establecidas, se for este o caso, polo comité previsto no artigo 19.

b) Se o gasto total previsto nas solicitudes tramitadas excede o límite orzamentario inicialmente asignado a esta medida:

1.º A aprobación das solicitudes tramitadas que se axusten á estratexia e directrices establecidas, se for este o caso, polo comité previsto no artigo 19, até o límite das disponibilidades orzamentarias.

2.º A aprobación condicionada á aceptación de certas adaptacións que se axusten á estratexia e directrices establecidas, se for o caso, polo comité previsto no artigo 19, até o límite das disponibilidades orzamentarias.

3.º O incremento da dotación orzamentaria destinada á medida.

Artigo 11. *Resolución.*

1. Unha vez aprobada pola Conferencia Sectorial de Agricultura e Desenvolvemento Rural a lista definitiva das accións e programas seleccionados e as condicións establecidas para eles, as comunidades autónomas ou o Fondo Español de Garantía Agraria, se for o caso, resolverán as solicitudes e notificaranas aos beneficiarios. O prazo máximo para a resolución e notificación do procedemento será de seis meses contados a partir do día seguinte á finalización do prazo de presentación das solicitudes.

Transcorrido o prazo de seis meses sen se ter notificado aos interesados resolución ningunha, estes poderán entender desestimada a súa solicitude de acordo co disposto no artigo 25.5 da Lei 38/2003, do 17 de novembro, xeral de subvencións.

2. No caso de resolución positiva, os beneficiarios comunicarán ao órgano competente da Comunidade Autónoma ou ao Fondo Español de Garantía Agraria, segundo o caso, a aceptación da resolución nos termos establecidos, así como a xustificación da constitución dunha garantía, de acordo coas condicións previstas no Regulamento de execución (UE) n.º 282/2012 da Comisión, do 28 de marzo de 2012, polo que se establecen as modalidades comúns de aplicación do réxime de garantías para os produtos agrícolas, por un importe non inferior ao 15 por cento do montante anual do financiamento comunitario, co fin de asegurar a correcta execución do programa.

3. A exixencia principal, conforme o artigo 20 do Regulamento de execución (UE) n.º 282/2012 da Comisión, do 28 de marzo, será a execución das accións obxecto da resolución favorable, que deberá alcanzar, ao menos, o cumprimento do 75 por cento do orzamento total.

4. Caso de que se produza a desistencia por parte dalgún beneficiario cuxa solicitude fose obxecto de resolución estimatoria, as comunidades autónomas deberán comunicalo ao Ministerio de Agricultura, Alimentación e Medio Ambiente, antes do 1 de decembro de cada ano, para o efecto de poder dispor dos fondos que se liberen.

Artigo 12. *Modificación das accións e programas.*

1. Non se poderán modificar produtos, actividades nin custos das accións e programas salvo cando sexa patente que se obterían mellores resultados coas modificacións propostas. Calquera destas modificacións debe ser obxecto dunha notificación previa ao órgano competente da comunidade autónoma ou ao Fondo Español de Garantía Agraria, segundo o caso, que deberá comprobar e, se for o caso, autorizar, as modificacións propostas que cumpran os requisitos para seren subvencionables.

2. En ningún caso se poderán modificar á alza os orzamentos aprobados para os programas nin se poderán incluír novos países.

3. As comunidades autónomas comunicarán ao Ministerio de Agricultura, Alimentación e Medio Ambiente antes do 1 de xuño de cada ano as modificacións que se produciron e que afecten as anualidades en curso.

4. As modificacións que afecten anualidades non comezadas, no caso de programas plurianuais, deberán ser notificadas, antes do 15 de febreiro de cada ano, ao órgano competente da comunidade autónoma para a súa aprobación, quen, pola súa vez, as comunicará ao Ministerio de Agricultura, Alimentación e Medio Ambiente antes do 15 de abril.

Artigo 13. *Financiamento.*

1. O financiamento comunitario das accións mencionadas no número 1 do artigo 4 do presente real decreto realizárase, de conformidade co artigo 3 do Regulamento (CE) n.º 1290/2005 do Consello, do 21 de xuño de 2005, sobre o financiamento da política agrícola comunitaria.

2. A participación financeira da Unión nos programas seleccionados non poderá superar o 50 por cento dos gastos subvencionables. Nos programas de dous ou tres anos de duración o límite máximo considérase para cada ano de execución.

3. A achega económica dos beneficiarios poderá proceder de tarifas ou contribucións obrigatorias.

Artigo 14. *Anticipos.*

1. O beneficiario, se non for organismo público, poderá presentar ao organismo competente da comunidade autónoma unha solicitude de anticipo que poderá chegar ao 80 por cento do importe da contribución comunitaria anual.

2. O pagamento dun anticipo subordinárase á constitución dunha garantía a favor do órgano competente da comunidade autónoma, por un importe igual ao 110 por cento do anticipo, de conformidade coas condicións establecidas no capítulo III do Regulamento de execución (UE) n.º 282/2012 da Comisión, do 28 de marzo.

Artigo 15. *Pagamentos.*

1. Poderase solicitar un único pagamento ou pagamentos intermedios da contribución comunitaria anual. As solicitudes referiranse ás accións realizadas e pagas.

2. Todos os pagamentos deben realizarse a través dunha conta bancaria única dedicada en exclusiva a este fin.

3. As solicitudes de pagamentos intermedios deberán presentarse ante o órgano competente da comunidade autónoma, antes de que conclúa o mes seguinte a aquel en que expire cada período de catro meses, a partir do 15 de xuño.

Os pagamentos intermedios e o pagamento do anticipo previsto no artigo 14 non poderán exceder no seu conxunto o 80 por cento do total da contribución comunitaria.

4. Unha vez finalizadas as accións de cada anualidade, e antes do 15 de xullo, o beneficiario poderá solicitar o pagamento do saldo da axuda ao órgano competente da súa comunidade autónoma ou ao Fondo Español de Garantía Agraria, segundo o caso.

5. A comunidade autónoma ou o Fondo Español de Garantía Agraria, segundo o caso, realizará os pagamentos nun prazo máximo de 75 días desde a recepción completa da solicitude de pagamento.

6. Para que se consideren admisibles, as solicitudes de pagamento irán acompañadas, ao menos, de:

a) Un informe resumo das accións desagregadas en actividades co correspondente importe orzamentario e o custo final de cada unha delas, e unha avaliación dos resultados obtidos que poden verificarse na data do informe.

b) As facturas e demais xustificantes de gasto dos pagamentos realizados. No caso de accións cuxa execución se subcontrate a provedores de servizo, deberase presentar factura do provedor e proba do pagamento efectivo.

c) Extracto bancario da conta mencionada no número 2 do presente artigo no cal poida comprobarse a realización dos pagamentos xustificadas mediante as facturas citadas na alínea b) do presente número.

7. O pagamento estará subordinado á presentación das contas auditadas e informes de auditoría de contas realizados por un auditor de contas ou sociedade de auditoría legalmente recoñecidos ou, na súa falta, á verificación de conformidade por parte da comunidade autónoma das facturas e dos documentos mencionados no número 6 do presente artigo.

8. Así mesmo, para a xustificación técnica das accións, poderase solicitar ao beneficiario que presente os medios de proba que demostren que se realizaron as accións promocionais.

9. Poderanse considerar subvencionables os custos de persoal da empresa dedicado ás actividades de promoción. Tamén serán subvencionables os custos xerais do beneficiario. As condicións para a subvencionabilidade deses gastos son as establecidas no anexo VII deste real decreto.

10. Non se poderán considerar subvencionables os custos referidos no anexo VIII deste real decreto.

Artigo 16. *Liberación de garantías.*

1. A garantía establecida no artigo 14 liberarase cando a comunidade autónoma recoñese o dereito definitivo a percibir o importe anticipado.

2. A garantía establecida no artigo 11 deberá ter validez até o momento do pagamento do saldo e liberarase cando a autoridade competente da comunidade autónoma acorde a súa cancelación.

Artigo 17. *Controis.*

1. Os órganos competentes da comunidade autónoma e o Fondo Español de Garantía Agraria, segundo o caso, realizarán un plan de control anual sobre a base dunha análise de riscos que incluírá, ao menos, o 20 por cento dos programas pagados o ano anterior.

2. O control terá por obxectivo comprobar na contabilidade xeral:

a) A exactitude da información facilitada coa solicitude de pagamento.
b) A realidade e regularidade das facturas presentadas como comprobantes dos gastos.

c) A exactitude do extracto bancario presentado.

d) Que non se perciben axudas incluídas no artigo 20 letra c), inciso iii), do Regulamento (CE) n.º 1698/2005 do Consello, do 20 de setembro de 2005, relativo á axuda ao desenvolvemento rural a través do Fondo Europeo Agrícola de Desenvolvemento Rural (Feader), ou do artigo 2 número 3 do Regulamento (CE) n.º 3/2008 do Consello, do 17 de decembro de 2007, sobre accións de información e de promoción dos produtos agrícolas no mercado interior e en terceiros países.

Artigo 18. *Comprobación do material.*

Os beneficiarios da axuda deberán asegurarse da conformidade do material de información e promoción elaborado no marco dos programas tanto coa normativa comunitaria como coa lexislación do terceiro país en que se desenvolva o programa. Para isto o beneficiario presentará á comunidade autónoma competente ou ao Fondo Español de Garantía Agraria, segundo o caso, unha declaración responsable onde indique a conformidade dese material e o cumprimento da normativa de aplicación correspondente.

Artigo 19. *Comité de Avaliación e Seguimento da Medida.*

1. No marco da Mesa de Promoción Alimentaria do Ministerio de Agricultura, Alimentación e Medio Ambiente constituirase un comité de avaliación e seguimento da medida de promoción, en diante Comité, no cal se integrarán catro representantes do Ministerio de Agricultura, Alimentación e Medio Ambiente designados pola Secretaría Xeral de Agricultura e Alimentación, un representante por cada unha das comunidades autónomas que desexen integrarse, un representante do ICEX España Exportación e Inversiones designado polo presidente do organismo, un representante da Federación española do viño e un de cooperativas agroalimentarias.

2. O Comité estará presidido polo director xeral da Industria Alimentaria, ou funcionario que designe para o efecto, da dita dirección xeral, con categoría de subdirector xeral. Actuará como secretario un funcionario da Subdirección Xeral de Promoción Alimentaria designado polo presidente, que actuará con voz pero sen voto.

3. As funcións do Comité serán:

- a) Elaboración da estratexia e directrices previstas no artigo 7.
- b) Seguimento da execución e avaliación das accións e programas.
- c) Proposta de accións e programas de interese xeral.
- d) Propor prioridades respecto a produtos e países destinatarios.

4. O Comité reunirse periodicamente en función das necesidades ou a pedimento dos seus membros. Para tal fin, será informado, en relación con cada un dos programas, do calendario das accións previstas, dos informes das actividades realizadas e dos resultados dos controis practicados.

Artigo 20. *Informes.*

1. As comunidades autónomas elaborarán un informe anual do resultado dos programas e controis efectuados que se presentará antes do 1 de novembro de cada ano ao Comité de Avaliación e Seguimento da Medida previsto no artigo 19.

2. O Ministerio de Agricultura, Alimentación e Medio Ambiente realizará anualmente un informe xeral dos programas acompañado, se for o caso, de propostas de modificación da medida.

Sección 2.ª Reestruturación e reconversión de viñas

Artigo 21. *Ámbito de aplicación.*

1. A axuda á reestruturación e reconversión de viñas establecida no artigo 103 octodecies do Regulamento (CE) n.º 1234/2007 do Consello, do 22 de outubro de 2007, será de aplicación ás viñas que se destinen á produción de uva para vinificación.

2. Non poderán acollerse a este réxime de axudas:

a) A renovación normal das viñas que chegasen ao final do seu ciclo natural, entendida como a «replantación dunha mesma parcela de terra coa mesma variedade de vide, segundo o mesmo método de cultivo».

b) As superficies que se beneficiasen desta axuda á reestruturación e reconversión de viñas nos últimos 10 anos, salvo para o cambio de vaso a espaller ou a outro sistema de condución. O período contabilizarase a partir da data en que o beneficiario solicitou o pagamento da axuda para esa superficie.

c) A arrinca e a plantación de viñas plantadas en virtude dunha concesión de novas plantacións outorgadas segundo o artigo 2 do Real decreto 1472/2000, do 4 de agosto, polo que se regula o potencial de produción vitícola, até pasados 10 anos da plantación.

d) As operacións de xestión diaria dunha viña.

Artigo 22. *Beneficiarios.*

1. Poderanse acoller á axuda á reestruturación e reconversión de viñas os viticultores cuxas viñas se destinen á produción de uva para vinificación.

2. Non poderán ser beneficiarios os titulares que contraveñan a normativa vixente en materia de plantacións de viña, para calquera das superficies de viña da súa explotación.

Artigo 23. *Actividades subvencionables.*

O apoio para reestruturación e reconversión de viñas soamente poderá concederse para unha ou varias das actividades seguintes:

- a) Reimplantación de viñas.
- b) Reconversión varietal.
- c) Mellora das técnicas de xestión de viñas.

Artigo 24. *Plans de reestruturación e reconversión de viñas.*

1. O réxime de reestruturación e reconversión de viñas levarase a efecto a través dos plans de reestruturación e reconversión, que conterán as correspondentes medidas que se pretende realizar. Os plans poderán ser anuais ou plurianuais, cunha duración máxima de 5 anos, sen que en ningún caso se estendan alén do exercicio financeiro 2018.

2. Os plans de reestruturación e reconversión de viñas serán colectivos. Non obstante, as comunidades autónomas poderán admitir plans individuais cando as súas circunstancias específicas así o aconsellen. O número mínimo de viticultores que poderán constituír un plan colectivo de reestruturación e reconversión de viñas será de 20. As comunidades autónomas poderán reducir o número mínimo de viticultores até 5 naquelas zonas en que, polas súas especiais características, non se poida alcanzar o número citado para a realización dos plans colectivos.

3. Os plans colectivos de reestruturación e reconversión realizaranse no marco dun acordo celebrado entre os viticultores participantes.

Artigo 25. *Presentación dos plans de reestruturación e reconversión de viñas.*

1. Os viticultores que queiran acollerse a un plan de reestruturación e reconversión de viñas obxecto de financiamento comunitario deberán presentar a correspondente solicitude ante o órgano competente da comunidade autónoma en que estean situadas as superficies que se van reestruturar ou reconverter, directamente ou a través de calquera dos lugares previstos na Lei 30/1992, do 26 de novembro, antes da data que determinará o citado órgano competente.

2. Os viticultores deberán achegar, xunto coa solicitude, o proxecto do plan, que deberá conter, ao menos, a seguinte información:

- a) Obxectivos perseguidos polo plan.
- b) Localización do plan e identificación.
- c) Identificación dos viticultores que o integran, se o plan é colectivo.
- d) Localización e características das parcelas, iniciais e reestruturadas (variedades, sistemas de formación, marco de plantación, etc.), con presentación da identificación dos recintos Sixpac das parcelas que integran o plan.
- e) Dereitos de plantación que se inclúen no proxecto especificando os dereitos de replantación de dentro ou fóra da explotación.
- f) Estudo de custos e calendario previsto de execución e de financiamento das actuacións.
- g) Nos casos en que o viticultor ou viticultores que realizan a solicitude non presentasen a solicitude única de axudas establecida no Real decreto 202/2012, do 23 de

xaneiro, sobre a aplicación a partir de 2012 dos pagamentos directos á agricultura e á gandaría, ou normativa que o poida substituír, deberase xuntar unha relación das referencias alfanuméricas do Sixpac de todas as parcelas agrícolas que forman parte da súa explotación, para efectos do control da condicionalidade establecido no artigo 36.

Naqueles casos en que o viticultor non sexa propietario da superficie nin titular da viña que se quere reestruturar ou reconverter, precisarase autorización do propietario e, se for o caso, do titular.

Artigo 26. *Requisitos dos plans.*

1. A superficie total reestruturada ou reconvertida no marco dun plan de reestruturación e reconversión de viñas deberá ser de, ao menos, 10 hectáreas para os plans colectivos e 0,5 hectáreas para os plans individuais.

Non obstante o disposto no parágrafo anterior, as comunidades autónomas poderán establecer límites superiores ou inferiores sempre que neste último suposto o tamaño medio das parcelas de viña desa comunidade sexa inferior a 0,2 hectáreas.

2. A parcela de viña, unha vez reestruturada ou reconvertida, terá que ser, ao menos, de 0,5 hectáreas. Non obstante, este límite poderá ser inferior se o número de parcelas, após a realización do plan de reestruturación e reconversión, é inferior ao 80 por cento do número de parcelas iniciais, ou se o tamaño medio das parcelas de viña para unha comunidade autónoma é inferior a 0,1 hectáreas, Tamén poderá ser inferior a 0,5 hectáreas se é estremeira con outra parcela do mesmo titular.

Nos casos en que a medida se limite a operacións de sobre enxertía ou de cambio de vaso a espaller ou a outro sistema de condución, a superficie mínima será a inicial.

3. A superficie máxima obxecto de resolución aprobatoria será de 25 hectáreas por viticultor e ano. Non obstante, as comunidades autónomas poderán reducir a superficie máxima para reestruturar ou reconverter por viticultor e ano.

4. Será obrigatoria en todas as plantacións, salvo nas situadas na Comunidade Autónoma das Illas Canarias, a utilización de portaenxertos certificados. Para percibir a axuda cómpre a presentación da factura do viveirista e o comprobante de pagamento.

Artigo 27. *Aprobación dos plans.*

1. As comunidades autónomas tramitarán as solicitudes e requirirán ao solicitante, se for o caso, a presentación da documentación ou información que se deba corrixir, ou da adicional pertinente.

As comunidades resolverán sobre as solicitudes dos plans presentados, sen que tal aprobación supoña ningún compromiso futuro de gasto por parte das administracións, no prazo máximo de seis meses desde a finalización do prazo de presentación de solicitudes.

Transcorrido o prazo de seis meses sen se ter notificado aos interesados resolución ningunha, estes poderán entender desestimada a súa solicitude, de acordo co disposto no artigo 25.5 da Lei 38/2003, do 17 de novembro, xeral de subvencións.

2. Na aprobación polas comunidades autónomas dos plans de reestruturación e reconversión de viñas, os plans colectivos serán prioritarios sobre os plans individuais. Ademais, as comunidades autónomas poderán establecer outros criterios de prioridade.

Artigo 28. *Asignación inicial de fondos.*

1. As comunidades autónomas remitirán ao Ministerio de Agricultura, Alimentación e de Medio Ambiente, antes do 31 de xullo de cada ano, as necesidades de financiamento para o exercicio financeiro seguinte de acordo co anexo IX.

2. Unha vez coñecidas as dispoñibilidades financeiras para a reestruturación e reconversión de viñas de cada exercicio, a Conferencia Sectorial de Agricultura e Desenvolvemento Rural, tendo en conta a información remitida polas comunidades autónomas prevista no número anterior, acordará a asignación inicial de fondos para cada comunidade autónoma. Tal asignación realizarase tendo en conta, en todo caso, a

superficie de viña e a necesidade de reestruturar determinadas viñas como consecuencia da falta de adecuación das súas producións ao mercado, sen prexuízo da reasignación posterior de fondos que se realizará, se for o caso, segundo o disposto no artigo 30.

Artigo 29. *Aprobación definitiva das medidas.*

1. Unha vez acordada, segundo o número 2 do artigo 28, a asignación de fondos para a reestruturación e reconversión de viñas, para cada comunidade autónoma e cada exercicio financeiro, as comunidades autónomas realizarán unha aprobación definitiva das medidas que serán financiadas en cada exercicio financeiro.

2. Considerarase como aprobación definitiva a resolución de pagamento realizada pola comunidade autónoma, unha vez solicitado polo beneficiario o pagamento da axuda de acordo ao artigo 34.

Artigo 30. *Reasignación de fondos entre comunidades autónomas.*

1. O máis tardar o 20 de xuño de cada ano, as comunidades autónomas enviarán á Dirección Xeral de Producións e Mercados Agrarios do Ministerio de Agricultura, Alimentación e Medio Ambiente a declaración dos pagamentos realizados polo organismo pagador no exercicio financeiro en curso, referidos ao venres da semana inmediatamente anterior á data do 20 de xuño, de acordo co anexo X.

2. Cando os pagamentos comunicados, de acordo co número anterior, por unha comunidade autónoma, excedan o 90 por cento da súa asignación inicial financeira acordada segundo o artigo 28.2 para o exercicio en cuestión e se a comunidade autónoma tiver necesidades de fondos até o 15 de outubro do exercicio financeiro en curso, por cima das cantidades pagadas á data prevista no número 1, estas necesidades poderanse atender en caso de existiren fondos non utilizados por outras comunidades autónomas. As necesidades deberán comunicarse de acordo co previsto no anexo XI.

3. Cando os pagamentos comunicados por unha comunidade autónoma de acordo co número 1 sexan inferiores ao 90 por cento da súa asignación inicial, procederase a unha reasignación dos fondos iniciais concedidos a esa comunidade autónoma segundo o artigo 28.2, axustándoos ao pagamento realizado e comunicado segundo o número 1.

4. Os fondos non utilizados distribuiranse entre as comunidades autónomas con necesidades, que cumpran co número 2, segundo os criterios acordados no artigo 28.2.

Artigo 31. *Prazo de finalización e pagamento das medidas.*

A comunicación da solicitude de pagamento referida no artigo 34 por parte dun beneficiario deberase realizar até o 31 de xullo de 2018, sen que en ningún caso o pagamento da medida se estenda alén do exercicio financeiro 2018.

Artigo 32. *Cálculo da axuda.*

1. Poderanse conceder axudas para:

a) Compensar os viticultores participantes no plan pola perda de ingresos derivada da súa aplicación.

b) Participar nos custos da reestruturación e reconversión de viñas.

2. A compensación aos viticultores por perdas de ingresos concederase durante un máximo de dúas campañas. A compensación será do 25 por cento do valor medio da uva das tres últimas campañas da provincia onde se sitúen as parcelas obxecto de reestruturación ou reconversión. As comunidades autónomas poderán establecer que esta compensación adopte a forma de coexistencia de vides vellas e novas durante dúas campañas.

Non obstante o disposto no parágrafo anterior, non terán dereito á compensación por perda de ingresos aquelas superficies reestruturadas coa achega dun dereito de replantación non xerado da aplicación do plan de reestruturación.

Cando a operación que se leve a cabo sobre unha parcela de viña sexa a sobreexertía ou a transformación de vaso a espaller ou a outro sistema de conducción, concederáse a compensación por perda de ingresos para esa superficie por unha campaña.

3. A participación nos custos da reestruturación e reconversión da viña unicamente poderá efectuarse para as operacións recollidas no anexo XII, sen que se poidan financiar operacións de forma illada, exceptuando a sobreexertía ou o cambio de vaso a espaller ou a outro sistema de conducción. Tampouco será subvencionable o material de segunda man.

A participación nos custos da reestruturación e reconversión da viña será o resultado de aplicar a porcentaxe fixada no número 6 do artigo 103 octodecés do Regulamento (CE) n.º 1234/2007 do Consello, do 22 de outubro de 2007, para os plans colectivos, e un 15 por cento inferior para os plans individuais, aos importes máximos establecidos para cada unha das operacións recollidas no anexo XII. O montante percibido en ningún caso poderá ser superior ao que resulte da aplicación desas porcentaxes sobre o gasto efectivamente realizado e demostrado mediante factura e comprobante de pagamento para todas aquelas operacións que non fosen executadas polo propio agricultor. As comunidades autónomas poderán dispor, para o seu ámbito territorial, a aplicación dunha porcentaxe inferior á fixada no número 6 do artigo 103 octodecés do Regulamento (CE) n.º 1234/2007 do Consello, do 22 de outubro de 2007, e non aplicar a subvención dalgunha das operacións recollidas no anexo XII.

Non se financiarán os custos de arrinca naquelas superficies onde se utilicen dereitos de replantación non xerados na aplicación do plan de reestruturación e se efectuase a arrinca con anterioridade á solicitude do plan.

4. As comunidades autónomas facilitarán anualmente ao Ministerio de Agricultura, Alimentación e Medio Ambiente información sobre os custos das operacións executadas polas cales se pagou a axuda, sobre a base dunha mostra de comprobantes de pagamento, co fin de revisar e, se for o caso, actualizar os importes fixados no anexo XII.

5. Para determinar o importe da axuda a que ten dereito un viticultor pola reestruturación e reconversión dunha superficie de viña, as comunidades autónomas realizarán unha medición da parcela reestruturada e, se for o caso, da parcela arrincada seguindo o método establecido no artigo 75 do Regulamento (CE) n.º 555/2008 da Comisión, do 27 de xuño.

6. Poderase autorizar a subrogación nos dereitos e obrigas derivados da aprobación do plan cando se dean, ao menos, os seguintes requisitos:

a) No caso de cambiar de parcela:

1.º Na nova parcela non se aprobarán operacións que non fosen solicitadas e aprobadas na orixinal.

2.º Todas as operacións se pagarán sobre a nova parcela.

b) No caso de autorizar a subrogación a un novo viticultor, este deberá asumir os compromisos adquiridos polo viticultor ao cal se lle aprobou o plan nas parcelas subrogadas.

7. Salvo causas de forza maior ou circunstancias excepcionais, segundo se recolle no artigo 31 do Regulamento (CE) n.º 73/2009 do Consello, do 19 de xaneiro de 2009, que establece disposicións comúns aplicables aos réximes de axuda directa aos agricultores no marco da política agrícola común e insta a determinados réximes de axuda aos agricultores, e que modifica os regulamentos (CE) n.º 1290/2005, (CE) n.º 247/2006, (CE) n.º 378/2007 e derroga o Regulamento (CE) n.º 1782/2003, nos casos de expropiación, as superficies acollidas aos plans de reestruturación e reconversión de viñas de acordo co presente real decreto deberán permanecer en cultivo un período

mínimo de dez campañas contando desde a campaña seguinte á da solicitude do pagamento. O seu incumprimento obrigará o beneficiario da axuda á devolución da axuda percibida máis os xuros legais correspondentes contando desde o momento do pagamento da axuda.

Artigo 33. *Anticipos.*

1. Non obstante o disposto no artigo 35.2, os participantes nos plans poderán solicitar un anticipo máximo de até o 80 por cento da axuda aprobada cando cumpran, ao menos, as seguintes condicións:

a) Cando comezase a execución da medida para a cal se solicita o anticipo. Para estes efectos considérase que comezou a execución cando se teña realizado a arrinca da plantación ou se presente factura de compra da planta e o pagamento dela mediante comprobante bancario, ou se demostre ou verifique fidedignamente calquera outra operación de carácter irreversible.

b) Cando constituísen unha garantía por un importe igual ao 120 por cento do anticipo da axuda aprobada.

2. Sen prexuízo do previsto no artigo 31, cando se concedan anticipos será obrigatorio executar a medida antes de que finalice a segunda campaña seguinte á concesión do anticipo. No caso de non executar a medida nos prazos establecidos, o viticultor reembolsará todo o anticipo que lle fose concedido máis os xuros legais correspondentes contando desde o momento do pagamento do anticipo, salvo que as superficies consideradas se encontren nunha zona que sufrise unha catástrofe natural recoñecida polas autoridades competentes ou as operacións previstas non se poidan levar a cabo debido a problemas fitosanitarios certificados por un organismo acreditado. Nestes casos poderase adaptar o período de execución da medida para non devolver o anticipo, e, en caso de se executar a medida antes do 31 de xullo de 2018, pagarase o saldo.

O viticultor, para ter dereito á axuda, deberá ter executado o 80 por cento da superficie pola cal cobrou o anticipo. En caso de non alcanzar a porcentaxe establecida, reembolsará todo o anticipo que lle fose concedido máis os xuros legais correspondentes desde o momento do pagamento do anticipo, salvo causas de forza maior ou circunstancias excepcionais.

3. Unha vez executada a medida para a cal se concedeu o anticipo, as comunidades autónomas determinarán a axuda definitiva a que ten dereito o viticultor, para o cal as superficies reestruturadas ou reconvertidas serán medidas seguindo o método contido no artigo 75 do Regulamento (CE) n.º 555/2008 da Comisión, do 27 de xuño. No caso de que o viticultor recibise un anticipo superior ao que ten dereito, reembolsará a diferenza entre o anticipo percibido e a axuda que lle corresponde, máis os xuros legais correspondentes contando desde o momento do pagamento do anticipo, salvo causas de forza maior ou circunstancias excepcionais.

Se a axuda a que ten dereito o viticultor é superior ao anticipo que lle foi concedido, terá dereito ao cobramento da diferenza, sen que en ningún caso a axuda total sexa superior á inicialmente solicitada.

4. O incumprimento da obrigaçión de executar as operacións para as cales se concedeu un anticipo será considerado como infracción leve segundo o previsto no artigo 38.1.g) da Lei 24/2003, do 10 de xullo, da viña e do viño.

Artigo 34. *Pagamento da axuda aos beneficiarios.*

1. Despois da finalización de cada medida, o beneficiario deberá presentar unha solicitude para o pagamento da axuda ante o órgano competente da súa comunidade autónoma.

2. A solicitude deberá ir acompañada, ao menos:

- a) Das facturas e comprobantes dos pagamentos que realice o beneficiario.
- b) Da relación actualizada das referencias alfanuméricas do Sixpac de todas as parcelas agrícolas que forman parte da explotación do beneficiario, no caso de que o beneficiario non presentase a solicitude única de axudas establecida no Real decreto 202/2012, do 23 de xaneiro, ou normativa que o poida substituír, para efectos do control da condicionalidade establecido no artigo 35.

Se durante o período en que deben cumprirse os requisitos legais de xestión e as boas condicións agrarias e ambientais se produciren cambios nas parcelas da explotación dun titular que recibise un pagamento para a reestruturación e reconversión de viña, este deberá actualizar a relación das parcelas da súa explotación antes do 30 abril.

3. A axuda pagarase segundo o cálculo establecido no artigo 32 do presente real decreto e unha vez que se comprobe que a medida se executou e se axusta aos plans aprobados.

4. Se o viticultor non executa a reestruturación ou reconversión en, ao menos, o 80 por cento da superficie para a cal se aprobou a axuda no plan, non terá dereito a ela. Así mesmo, non se pagará polas operacións non realizadas. No caso de que un viticultor non execute as operacións para as cales se aprobou a axuda, será considerado como infracción leve segundo o previsto no artigo 38.1.g) da Lei 24/2003, do 10 de xullo, e será sancionado de conformidade co establecido no artigo 42.1 da citada lei, salvo causas de forza maior ou circunstancias excepcionais.

5. A comunidade autónoma deberá emitir unha resolución de pagamento e realizar o pagamento ao beneficiario nun prazo máximo de 6 meses desde a data da resolución de pagamento.

6. Non se poderán financiar con cargo ao Programa de apoio 2014 a 2018 medidas de plans presentados no marco do Regulamento (CE) n.º 1493/1999 do Consello, do 17 de maio, polo que se establece a organización común do mercado vitivinícola.

Artigo 35. *Condicionalidade.*

Se se constata que un beneficiario, en calquera momento ao longo dos tres anos seguintes ao pagamento da axuda recibida en virtude da presente sección, non respectou na súa explotación os requisitos legais de xestión e as boas condicións agrarias e ambientais a que se refiren os artigos 4, 5 e 6 do Regulamento (CE) n.º 73/2009 do Consello, do 19 de xaneiro de 2009, o importe da axuda, en caso de que o incumprimento se deba a unha acción ou omisión atribuíble directamente ao beneficiario, reducirase ou cancelarse, parcial ou totalmente, dependendo da gravidade, alcance, persistencia e repetición do incumprimento, e o beneficiario deberá reintegrala se procede, conforme o establecido nas citadas disposicións.

Artigo 36. *Comunicacións.*

1. As comunidades autónomas remitirán ao Ministerio de Agricultura, Alimentación e Medio Ambiente antes do 15 de novembro de cada ano, e referido ao exercicio financeiro precedente, un informe anual dos controis que sobre o terreo se efectuaron en materia de reestruturación e reconversión de viñas e que conteña, ao menos, a información indicada no anexo XIII.

2. As comunidades autónomas remitirán ao Ministerio de Agricultura, Alimentación e Medio Ambiente antes do 15 de novembro de cada ano, e referido ao exercicio financeiro precedente, un informe anual sobre a aplicación do réxime de reestruturación e reconversión de viñas.

*Sección 3.ª Eliminación de subproductos**Artigo 37. Ámbito de aplicación.*

1. Os produtores estarán obrigados á eliminación dos subproductos obtidos na transformación. Non obstante, os produtores que, na campaña vitícola de que se trate, non produzan máis de 25 hectolitros de viño ou mosto nas súas instalacións non estarán obrigados a retirar os subproductos.

2. Poderase cumprir parcial ou totalmente coa obrigación de eliminar os subproductos de vinificación ou de calquera outra transformación de uvas mediante a entrega dos subproductos para a destilación a un destilador autorizado, ou realizando unha retirada baixo control tal e como se establece no artigo 45. Sen prexuízo do número 1, a comunidade autónoma poderá establecer a obrigatoriedade de eliminar a totalidade dos subproductos producidos na súa rexión mediante a destilación.

Artigo 38. Requisitos dos subproductos entregados á destilación.

1. O volume de alcohol contido nos subproductos destinados á destilación deberá ser:

a) O 10 por cento do volume de alcohol contido no viño producido obtido por vinificación directa da uva. As comunidades autónomas poderán reducir a porcentaxe do volume de alcohol contido nos subproductos ao 7 por cento para os viños brancos con denominación de orixe protexida do seu ámbito territorial, sempre que se xustifique polo sistema de elaboración a imposibilidade de chegar ao 10 por cento, e que o seu rendemento en viño non supere os límites establecidos polo consello regulador correspondente.

b) O 5 por cento do volume de alcohol contido no produto elaborado, para os elaboradores de viño a partir de mosto ou de viño novo en proceso de transformación.

2. Se non se atinxiren as porcentaxes fixadas no número 1, os produtores que procederon á vinificación deberán entregar unha cantidade de viño da súa propia produción para chegar ás citadas porcentaxes.

3. Para determinar o volume de alcohol que deben ter os subproductos en relación co do viño producido aplicaranse os seguintes graos alcohólicos volumétricos naturais do viño nas diferentes zonas vitícolas, tal e como se establecen no Regulamento (CE) n.º 555/2008 da Comisión, do 27 de xuño:

- a) 9,0 por cento para a zona CI.
- b) 9,5 por cento para a zona CII.
- c) 10 por cento para a zona CIII.

4. O contido mínimo de alcohol puro dos subproductos da vinificación que vaian á destilación deberá ser o seguinte:

- a) Bagazos de uva: 2,8 litros de alcohol puro por cada 100 quilogramos.
- b) Feces de viño: 4 litros de alcohol puro por cada 100 quilogramos.

5. As entregas dos subproductos deberanse realizar:

- a) A un destilador autorizado no caso dos bagazos e as feces.
- b) Entregando viño a un destilador autorizado ou a un fabricante de vinagre, segundo o número 2 do artigo 23 do Regulamento (CE) n.º 555/2008 da Comisión, do 27 de xuño. No caso de produtores que entreguen viño a unha fábrica de vinagre, a cantidade de alcohol contida nos viños entregados deducirase da cantidade de alcohol que deba entregarse para cumprir coa obrigación establecida.

Artigo 39. *Autorización de destiladores.*

1. Os destiladores deberán estar autorizados polo órgano competente da comunidade autónoma en cuxo territorio estean radicadas as instalacións de destilación, para actuaren no marco do artigo 103 tercivies do Regulamento (CE) n.º 1234/2007, do Consello, do 22 de outubro.

Os destiladores establecidos noutros Estados membros da Unión Europea tamén poderán ser beneficiarios das axudas para a destilación dos subprodutos entregados por produtores españois, sempre que sexan autorizados polo Fondo Español de Garantía Agraria, mediante un protocolo de colaboración ou calquera outra forma acordada coas autoridades competentes do Estado membro en cuestión.

2. As autorizacións terán validez en canto non se retiren expresamente ou o destilador non renuncie a elas. Non obstante o anterior, os destiladores deberán comunicar á autoridade competente, antes do inicio de cada campaña vitícola, a súa intención de prorrogar ou suspender a súa colaboración na campaña, así como declarar que cumpriron satisfactoriamente os requisitos establecidos na normativa comunitaria durante a campaña anterior.

En caso de solicitar esta prórroga, a autoridade competente procederá a confirmar a autorización, se procede, comunicando esta circunstancia aos interesados.

3. O destilador que sufra algunha variación en relación coas condicións en virtude das cales se lle concedeu a autorización deberá comunicalo de forma inmediata á autoridade competente.

4. As comunidades autónomas remitirán ao Fondo Español de Garantía Agraria, antes do 1 de setembro de cada campaña, a relación dos destiladores autorizados que colaboran con este réxime de axuda, con indicación do enderezo das súas instalacións.

Artigo 40. *Prazo de entrega á destilación.*

A data límite de entrega dos subprodutos a un destilador autorizado será o 15 de xuño de cada campaña.

Artigo 41. *Axuda á destilación de subprodutos.*

1. Concederáse unha axuda aos destiladores autorizados que transformen os subprodutos obtidos en territorio nacional, entregados para a súa destilación en alcohol bruto cun grao alcohólico mínimo do 92 por cento vol.

2. As operacións de destilación deberán finalizarse o máis tardar o 15 de xullo da campaña vitícola de que se trate.

3. O importe máximo da axuda que se pagará aos destiladores autorizados pola destilación dos subprodutos é o seguinte:

- a) 1,100 €/por cento vol./hl para alcohol bruto obtido a partir de bagazos; e
- b) 0,500 €/por cento vol./hl para alcohol bruto obtido a partir de viño e feces.

4. Como compensación aos gastos de transporte e recolla dos subprodutos, o destilador pagará ao produtor os seguintes importes máximos cando este último demostre ter soportado os ditos gastos:

- a) 0,571 €/por cento vol./hl polos bagazos entregados.
- b) 0,400 €/por cento vol./hl polo viño e feces entregados.

5. O alcohol obtido da destilación de subprodutos polo cal se concedeu unha axuda utilizarase exclusivamente con fins industriais ou enerxéticos co fin de evitar distorsións da libre competencia.

Artigo 42. *Solicitudes de axuda.*

1. A solicitude de axuda deberá presentarse entre o 16 de outubro e o 20 de xullo de cada campaña polo alcohol obtido durante a campaña, ante o órgano competente da comunidade autónoma onde estean as instalacións de destilación, directamente ou a través de calquera dos medios previstos no artigo 38.4 da Lei 30/1992, do 26 de novembro.

2. As solicitudes presentaranse conforme un modelo que conteña, ao menos, os datos que figuran no anexo XIV, e acompañada, ao menos, da seguinte documentación:

- a) Proba de destilación dos subprodutos.
- b) Relación das entregas de materias primas efectuadas polos produtores que deron orixe ao alcohol obtido.
- c) Proba do pagamento por parte do destilador ao produtor dos gastos de transporte, ou a renuncia do destilador a efectualo.
- d) Se for o caso, a xustificación do destino do alcohol obtido de acordo co indicado no artigo 44.

Se após a verificación dos datos contidos na solicitude se comprobar a existencia de datos falsos que en ningún caso poidan considerarse erros ou defectos corrixibles, a solicitude non se considerará admisible para recibir ningunha axuda por esta medida, isto sen prexuízo da instrución do procedemento de infracción segundo o previsto no artigo 39.1.d) da Lei 24/2003, do 10 de xullo.

Artigo 43. *Pagamento da axuda ao destilador.*

1. Non se aboará ningunha axuda polo volume de alcohol contido nos subprodutos que supere o 10 por cento da riqueza alcohólica do viño producido a nivel nacional.

2. O destilador autorizado poderá recibir un anticipo do 60 por cento da axuda polos volumes solicitados sempre que demostre:

- a) Que efectuou o pagamento de ao menos a porcentaxe equivalente dos importes establecidos en concepto de transporte ao produtor, cando este o tiver efectuado, ou presente a renuncia deste a efectualo.
- b) Que o alcohol obtido da destilación polo cal se solicita a axuda foi destinado a fins enerxéticos ou industriais ou que foi desnaturalizado, tal e como establece o artigo 44.

Non obstante, caso de non dispor dos comprobantes indicados, exixirase a presentación dunha garantía igual ao importe do anticipo incrementado nun 20 por cento.

Nos casos en que se aboase un anticipo con garantía, esta liberarase cando se dispoña dos comprobantes indicados anteriormente.

3. En cada campaña, e unha vez que se coñezan as cantidades efectivamente entregadas á destilación polas cales se solicita a axuda e a cantidade de viño producido, contrastarase o volume do alcohol polo cal se solicita axuda contido nos produtos entregados coa riqueza alcohólica do viño producido a nivel nacional.

4. Cando a cantidade de alcohol pola cal se solicite axuda nunha campaña determinada supere o 10 por cento da riqueza alcohólica citada no parágrafo anterior, reducirase a axuda en función da porcentaxe de exceso. O Fondo Español de Garantía Agraria fixará a porcentaxe de redución, de forma que se garanta que o gasto orzamentario non exceda o que se tería alcanzado se non se tivese excedido a cantidade máxima con dereito a axuda.

5. Unha vez establecida a contía definitiva da axuda, a autoridade competente procederá ao pagamento da axuda correspondente ou do saldo no caso de se ter aboado un anticipo, en calquera caso antes do 16 de outubro da campaña seguinte.

6. Antes de se efectuar o dito pagamento deberá comprobarse que o destilador autorizado relizou, se foi caso diso, o aboamento ao produtor da totalidade do gasto de

transporte que lle corresponda, reducida, se corresponde, en idéntica proporción á minoración global da axuda establecida no número 4.

En caso de non demostrar o dito aboamento, o destilador autorizado deberá devolver as cantidades anticipadas xunto cos xuros correspondentes ou executarase a garantía presentada pola dita contía.

7. Se no momento do pagamento do saldo da axuda non foi presentado o comprobante do destino do alcohol por parte do destilador, deberase ampliar a garantía polo importe pendente de pagamento incrementado nun 20 por cento.

8. Se non se presentou a dita ampliación de garantía, o destilador autorizado deberá devolver as cantidades anticipadas xunto cos xuros correspondentes ou executarase a garantía presentada pola dita contía.

9. En calquera caso, os comprobantes do destino do alcohol obtido deberán ser enviados polo destilador autorizado á autoridade competente antes do 31 de xaneiro da campaña seguinte; en caso contrario, o destilador autorizado deberá reintegrar as cantidades recibidas xunto cos xuros correspondentes ás partidas cuxo destino non se demostrase ou executarase a garantía presentada pola dita contía. O Ministerio de Agricultura, Alimentación e Medio Ambiente poderá ampliar a data indicada cando a situación do mercado o exixa.

10. Non obstante o anterior, para calcular o alcohol que ha chegar a destino, deberánse ter en conta as porcentaxes de perda, de acordo co indicado no artigo 44.

Artigo 44. *Xustificación do destino do alcohol obtido.*

1. O alcohol que resulte da destilación á cal se concedeu axuda deberase utilizar unicamente con fins industriais ou enerxéticos co fin de evitar distorsións da libre competencia.

O destilador autorizado deberá presentar como comprobante deste destino ante a autoridade competente, no prazo máximo de 10 días hábiles desde que finalice a saída de cada lote, un certificado de saídas diarias do alcohol, mencionando, ao menos, a cantidade e o grao volumétrico do alcohol que saíu e a identificación do produtor; ben como unha copia dos documentos de acompañamento que amparan a circulación dos produtos obxecto de impostos especiais de fabricación, co selo do destinatario aceptando o produto e o compromiso escrito do destinatario de utilizar ese alcohol exclusivamente con estes fins.

2. Na xustificación do destino do alcohol que resulte da destilación á cal se concedeu a axuda admitiranse as seguintes porcentaxes de perda:

a) 0,50 por cento das cantidades de alcohol almacenadas por trimestre de almacenamento como perda de alcohol debida á evaporación.

b) 0,50 por cento das cantidades de alcohol retiradas dos almacéns como perda de alcohol debida a un ou varios transportes terrestres.

3. Poderase considerar que o alcohol obtido tivo un uso industrial ou enerxético se foi desnaturalizado, de acordo co establecido no Regulamento dos impostos especiais, aprobado mediante o Real decreto 1165/1995, do 7 de xullo, cun produto que impida a utilización para usos distintos ao industrial ou enerxético.

En calquera caso, a autoridade competente deberá obter do destilador autorizado información sobre o destino final deste alcohol desnaturalizado.

Artigo 45. *Retiradas baixo control.*

1. Poderase utilizar un procedemento de retirada controlada para a eliminación de subprodutos cando se comunicase á autoridade competente que se vai optar por este sistema de eliminación, mediante a presentación dun proxecto detallado.

O proxecto citado deberá conter a referencia ao tipo de produto e unha descrición detallada do procedemento proposto para a retirada. Así mesmo, deberase presentar,

cando a comunidade autónoma o considere necesario, a conformidade da autoridade ambiental sobre a procedencia da retirada.

A operación de retirada controlada debe ser autorizada por parte da autoridade competente, que establecerá as condicións da súa realización e que deberá ser notificada ao produtor.

2. A retirada das feces, caso de que non se envíen a destilación, poderase considerar efectuada cando estas se desnaturalizen de forma que imposibilite a súa utilización no proceso de vinificación e a súa entrega a terceiros se consignase nos rexistros correspondentes.

3. O contido mínimo de alcohol puro dos subprodutos para retirar será o indicado para os destinados á destilación no número 4 do artigo 38 da presente sección.

Artigo 46. *Sancións.*

O incumprimento da entrega dos subprodutos á destilación ou da realización, na súa falta, da retirada baixo control, será considerada como unha infracción leve segundo o disposto nas letras j) e k) do artigo 38 da Lei 24/2003, do 10 de xullo.

Sección 4.ª Inversións

Artigo 47. *Ámbito de aplicación.*

Con obxecto de mellorar a adaptación ás demandas do mercado e aumentar a competitividade e o rendemento global das empresas do sector vitivinícola, concederase apoio financeiro aos investimentos destinados a mellorar as condicións de produción, comercialización, ou ambas, e ao desenvolvemento de novos produtos, procedementos e tecnoloxías, relacionados exclusivamente cos produtos que se describen no anexo XI ter do Regulamento (CE) n.º 1234/2007 do Consello, do 22 de outubro de 2007, e que se producen en territorio español.

Artigo 48. *Beneficiarios.*

1. Poderán presentar solicitudes para acollerse ao financiamento da medida de investimentos as persoas físicas ou xurídicas titulares de microempresas e pequenas e medianas empresas, segundo se definen na Recomendación 2003/361/CE da Comisión, do 6 de maio de 2003, que produzan, comercialicen ou realicen ambos os procesos respecto aos produtos mencionados no artigo anterior, que teñan actividade no momento de presentación da solicitude ou que a inicien co proxecto presentado coa solicitude, e que sexan responsables finais do financiamento do proxecto.

Así mesmo, poderán beneficiarse da medida as empresas con menos de 750 empregados ou cuxo volume de negocio sexa inferior a 200 millóns de euros, que cumpran cos mesmos requisitos de produción e comercialización mencionados no parágrafo anterior. No suposto destas empresas intermedias, a intensidade máxima de axuda reducirase á metade.

Non obstante, cando se trate de solicitudes cuxa actividade sexa unicamente a comercialización, ao menos un 80 por cento da súa facturación do último exercicio fechado deberá proceder da comercialización dos produtos do anexo XI ter do Regulamento n.º 1234/2007 do Consello, do 22 de outubro de 2007.

No caso de beneficiarios que inicien a súa actividade no ámbito da comercialización, deberán presentar un compromiso escrito de que ao menos o 80 por cento da súa facturación procederá da comercialización dos produtos do anexo XI ter do Regulamento n.º 1234/2007 do Consello, do 22 de outubro de 2007.

2. A empresa deberá demostrar viabilidade económica e suficiente capacidade e medios para asegurar a adecuada execución do investimento.

Por tanto, non se concederá a axuda financeira ás empresas en situación de crise, segundo se define nas directrices comunitarias sobre axudas estatais de salvamento e de

reestruturación de empresas en crise, de acordo coa Comunicación (2004/C244/02) da Comisión, do 1 de outubro de 2004.

Así mesmo, non se concederán axudas financeiras a aqueles solicitantes que non demostren estar ao día nas súas obrigacións tributarias e coa Seguridade Social, ben como das súas obrigacións por reintegro de subvencións.

3. Os beneficiarios das subvencións deberán demostrar a durabilidade das operacións relativas aos investimentos durante os cinco anos seguintes desde a data do pagamento final da axuda.

Así mesmo, a durabilidade será exigible aos adquirentes nos supostos de transmisión da actividade produtiva e das infraestruturas ligadas a ela obxecto da axuda, e deberase probar fidedignamente ante a autoridade competente que esta circunstancia é coñecida e aceptada polos adquirentes, de conformidade co previsto no artigo 72 do Regulamento (CE) n.º 1698/2005 do Consello, do 20 de setembro. Se esta aceptación non se probar fidedignamente, continuará sendo responsable o beneficiario da axuda.

Artigo 49. *Actuacións, operacións e gastos subvencionables.*

1. Serán admisibles as actuacións relativas a investimentos tanxibles ou intanxibles que se describen no anexo XV.

A título orientativo incluírase na páxina web do Ministerio de Agricultura, Alimentación e Medio Ambiente unha lista de posibles operacións, sen carácter exhaustivo, para realizar nos investimentos de transformación e/ou comercialización.

2. Consideraranse como gastos subvencionables os recollidos no artigo 17 do Regulamento (CE) n.º 555/2008 da Comisión, do 27 de xuño de 2008, nas súas alíneas a) e b), e até un 8% dos gastos xerais ligados a esas alíneas que se conteñen na alínea c).

Para efecto dos investimentos da medida de «Desenvolvemento de novos produtos admisibles» será de aplicación o disposto no artigo 18 do Regulamento (CE) n.º 555/2008 da Comisión, do 27 de xuño de 2008.

3. Non terán a consideración de subvencionables os gastos descritos no anexo XVI.

Artigo 50. *Características dos proxectos.*

1. Os proxectos de investimento estarán claramente definidos, especificando as actuacións/operacións e detallando os conceptos de gasto que compoñen cada operación e os custos estimados de cada unha delas, e respectarán a moderación de custos tal como establece o artigo 24.2.d) do Regulamento (UE) n.º 65/2011 da Comisión, do 27 de xaneiro de 2011, polo que se establecen disposicións de aplicación do Regulamento (CE) n.º 1698/2005 do Consello no que respecta á aplicación dos procedementos de control e á condicionalidade en relación coas medidas de axuda ao desenvolvemento rural, o seu calendario previsto de execución e, no caso de investimentos en comercialización para realizar noutros países da UE diferentes a España, deberase indicar a localización exacta.

2. Os proxectos de investimento, que poderán ser anuais ou plurianuais, terán un prazo máximo de execución e de financiamento de 4 anos. En calquera caso, a execución dos proxectos deberá realizarse antes do 1 de xuño de 2018 e o pagamento da axuda efectuarse antes do fin do exercicio Feaga 2018.

3. Os investimentos non poderán comezar antes da presentación da solicitude de axuda, salvo os gastos sinalados no anexo XVI, 5, a e b, que poderán ser tidos en consideración a partir da data de publicación deste real decreto nas solicitudes presentadas no ano 2014 e nos doce meses previos á data de solicitude nos anos posteriores.

O inicio das operacións do proxecto de investimento previamente á resolución non implica compromiso ningún por parte da Administración sobre a concesión da axuda.

Artigo 51. Presentación de solicitudes.

1. Os interesados que reúnan as condicións exixidas presentarán a súa solicitude acompañada dun proxecto de investimento e a documentación correspondente, dirixida ao órgano competente da comunidade autónoma en que se encuentre situado o establecemento en que vaia realizarse o investimento. Non obstante, nos casos de proxectos de comercialización desvinculados fisicamente dunha adega, ben como en todos os casos de comercialización noutro Estado membro, as solicitudes deberanse dirixir ao órgano competente da comunidade en que se encuentre situado o domicilio fiscal do solicitante. As solicitudes presentaranse directamente ou a través de calquera dos medios previstos no artigo 38.4 da Lei 30/1992, do 26 de novembro, antes do 1 de febreiro de cada ano, e por primeira vez antes do 1 de febreiro de 2014.

Así mesmo, a solicitude poderá incluír a petición correspondente de certificación do non inicio do investimento no momento da súa presentación.

2. Os proxectos de investimento deberán, en todo caso, cumprir o disposto neste real decreto e na normativa comunitaria relativa á medida de investimentos, así como na demais lexislación aplicable, e conter, cando menos, a seguinte información que permita a súa valoración en concorrencia competitiva: información xeral da empresa, información económica, financeira e social, información comercial e información técnica. En particular, deberán especificar os medios propios ou externos con que se contará para o desenvolvemento do proxecto.

Na páxina web do Ministerio de Agricultura, Alimentación e Medio Ambiente publicarase, a título informativo, un modelo de formulario que permita desenvolver a información solicitada, sen prexuízo dos formularios que cada comunidade autónoma considere oportuno utilizar co mesmo fin, no ámbito das súas competencias.

3. Os proxectos presentados deberán estar o suficientemente desenvolvidos como para que poida avaliarse a súa conformidade coa normativa e a súa viabilidade técnica e económica, de acordo cos criterios establecidos no anexo XVII.

Artigo 52. Tramitación das solicitudes.

1. As comunidades autónomas examinarán as solicitudes presentadas no seu ámbito competencial, canto á súa conformidade con este real decreto e coas necesidades estruturais detectadas, e requirirán ao solicitante, se for o caso, a presentación da documentación ou información que se deba corrixir, ou da adicional pertinente.

2. De acordo cos criterios de valoración establecidos no anexo XVII, as comunidades autónomas elaborarán unha lista provisoria cos proxectos de investimento seleccionados e ordenados por prioridade, e remitirana ao Ministerio de Agricultura, Alimentación e Medio Ambiente antes do 1 de maio, no formato electrónico, de conformidade co anexo XVIII, do presente real decreto, dispoñible na web do Ministerio de Agricultura, Alimentación e Medio Ambiente. Á lista xuntaráse a documentación dos proxectos seleccionados recollidos no mencionado anexo XVIII.

En caso de empate darase prioridade aos proxectos presentados por empresas de base cooperativa, microempresas e pequenas e medianas empresas que presenten proxectos de comercialización conxunta.

3. A partir das listas provisorias dos proxectos de investimento seleccionados polas comunidades autónomas, a Dirección Xeral da Industria Alimentaria elaborará a proposta de lista definitiva e someteraa ao informe vinculante da Conferencia Sectorial de Agricultura e Desenvolvemento Rural, tendo en conta a dotación orzamentaria dispoñible para o exercicio Feaga e a reserva de fondos necesaria para os exercicios seguintes.

Non se incluírán na proposta de lista definitiva aqueles proxectos de investimento que na fase de valoración non alcancen un mínimo de 15 puntos.

Artigo 53. Resolución.

1. Unha vez recibido o informe da Conferencia Sectorial de Agricultura e Desenvolvemento Rural sobre a lista definitiva dos proxectos de investimento seleccionados, as comunidades autónomas ditarán as resolucións correspondentes e notificarano aos beneficiarios. O prazo máximo para a resolución e notificación do procedemento será de seis meses contados a partir do día seguinte á finalización do prazo de presentación das solicitudes. En calquera caso, non poderá efectuarse con anterioridade ao 1 de xullo de 2014.

Transcorrido o prazo de seis meses sen se ter notificado aos interesados resolución ningunha, estes poderán entender desestimada a súa solicitude de acordo co disposto no artigo 25.5 da Lei 38/2003, do 17 de novembro.

2. En caso de resolución positiva, os beneficiarios comunicarán ao órgano competente da comunidade autónoma nos quince días seguintes á notificación da resolución a súa aceptación nos termos establecidos ou, se for o caso, a renuncia. A aceptación deberá acompañarse dunha garantía de boa execución, de acordo coas condicións previstas no Regulamento de execución (UE) n.º 282/2012 da Comisión, do 28 de marzo de 2012, por un importe do 15 por cento do montante do financiamento comunitario, co fin de asegurar a correcta execución do proxecto.

3. A exixencia principal, conforme o artigo 19 do Regulamento (UE) de execución (UE) n.º 282/2012 da Comisión, do 28 de marzo, será atinxir o obxectivo final do proxecto de investimento, cun cumprimento de ao menos o 70 por cento do orzamento total aprobado por resolución do órgano competente, e sempre que os investimentos realizados sexan operativos.

4. A comunidade autónoma deberá comunicar ao Ministerio de Agricultura, Alimentación e Medio Ambiente antes do 1 de decembro de cada ano as aceptacións, renuncias ou desistencias que se producisen dentro do procedemento, para poder dispor dos fondos que se liberen, se for o caso.

5. A comunidade autónoma emitirá as correspondentes resolucións denegatorias motivadas para aqueles casos en que se desestime a solicitude de axuda e os recursos que, se for o caso, procedan.

Artigo 54. Modificación dos proxectos de investimento.

1. O beneficiario poderá solicitar a modificación das operacións previstas nun proxecto de investimento, sempre que non se altere o obxectivo final, antes do 1 de febreiro do exercicio Feaga correspondente.

2. Calquera modificación significativa, incluídas as de calendario de execución, deberá ser autorizada polo órgano competente da comunidade autónoma, logo de solicitude do beneficiario.

3. As modificacións que supoñan un incremento dos orzamentos aprobados para os proxectos de investimento non suporán incremento da subvención concedida.

4. As modificacións das operacións aprobadas que supoñan unha diminución dos orzamentos aprobados suporán a redución proporcional da subvención concedida, sempre que o proxecto de investimento continúe cumprindo o número 1 deste artigo.

5. Tampouco se poderán modificar os orzamentos á baixa por importes superiores ao 10 por cento do orzamento total aprobado por resolución se se realizan durante o último trimestre do período en que finalice o proxecto.

6. As comunidades autónomas comunicarán as modificacións que se produciron ao Ministerio de Agricultura, Alimentación e Medio Ambiente antes do 15 de maio do exercicio Feaga correspondente.

Artigo 55. Financiamento.

1. Aplicarase á contribución comunitaria os seguintes tipos máximos de axuda en relación cos custos de investimento admisibles:

a) 50 por cento nas comunidades autónomas clasificadas como rexións de converxencia conforme o Regulamento (CE) n.º 1083/2006 do Consello, do 11 de xullo de 2006, polo que se establecen as disposicións xerais relativas ao Fondo Europeo de Desenvolvemento Rexional, ao Fondo Social Europeo e ao Fondo de Cohesión e se derroga o Regulamento (CE) n.º 1260/1999.

b) 40 por cento nas comunidades autónomas distintas das rexións de converxencia.

c) 75 por cento na Comunidade Autónoma das Illas Canarias.

d) Para os investimentos noutros países da Unión Europea terase en conta a súa localización para determinar a porcentaxe de axuda.

Aplicaranse os tipos máximos de axuda establecidos no número 4 do artigo 103 duovicies do Regulamento (CE) 1234/2007.

2. Os proxectos de investimento anuais financiaranse con cargo ao exercicio Feaga en que se finalicen. Os proxectos plurianuais financiaranse con cargo aos exercicios Feaga consecutivos para os cales fose solicitado e aprobado o investimento.

Artigo 56. *Anticipos.*

1. O beneficiario poderá presentar ao organismo competente da comunidade autónoma unha solicitude de anticipo que poderá alcanzar a contía establecida no número 2 do artigo 19 do Regulamento (CE) n.º 555/2008.

2. O pagamento dun anticipo subordinarase á constitución dunha garantía bancaria ou das previstas no Real decreto 161/1997, do 7 de febreiro, que aproba o Regulamento da Caixa Xeral de Depósitos, a favor do órgano competente da comunidade autónoma, por un importe igual ao 110 por cento dese anticipo, de conformidade coas condicións previstas no Regulamento (CE) n.º 555/2008 da Comisión, do 27 de xuño de 2008, e no Regulamento de execución (UE) n.º 282/2012 da Comisión, do 22 de marzo de 2012, polo que se establecen as modalidades comúns de aplicación do réxime de garantías para os produtos agrícolas.

3. Deberase solicitar o anticipo o máis tardar nos 30 días seguintes á aceptación da resolución.

4. As comunidades autónomas comunicarán ao Ministerio de Agricultura, Alimentación e Medio Ambiente antes do 1 de decembro a lista cos proxectos que solicitaron anticipo e a contía deste.

5. Para o pagamento do saldo da axuda descontarase, se for o caso, o anticipo percibido.

Artigo 57. *Pagamentos.*

1. A solicitude de pagamento irá acompañada, ao menos, da seguinte documentación:

a) Memoria de execución valorada, incluíndo, se for o caso, a xustificación das causas excepcionais ou de forza maior.

b) Documentación probatoria da data de inicio das operacións, que deberá ser posterior á da solicitude, no caso de que non existan no órgano xestor da comunidade autónoma actas de non inicio da actividade ou outros controis *in situ* equivalentes.

c) Declaración do beneficiario relativa ao financiamento dos gastos efectuados. No caso de financiamento mediante créditos ou préstamos, deberá presentarse, ademais, fotocopia da escritura de formalización destes.

d) Relación das diferenzas existentes entre os traballos previstos e os realizados.

e) Declaración do beneficiario sobre outras axudas concedidas e/ou solicitadas para os mesmos investimentos, xuntando, se for o caso, copia da resolución de concesión.

f) Declaración relativa á conta bancaria en que solicita o ingreso da concesión.

g) No caso de adquisición de edificacións deberase presentar, ademais, un certificado dun taxador independente debidamente acreditado, ou dun órgano ou

organismo público debidamente autorizado, en que se acredite que o prezo de compra non excede o valor de mercado, desagregando o valor do solo a prezos de mercado.

h) Facturas ou documentos contables de valor probatorio equivalente, respecto do gasto, e acreditación dos pagamentos.

i) Extracto bancario da conta única a través da cal se realizaron os pagamentos.

j) Licenza de actividade, nos casos que sexa necesaria.

k) Inscripción no Rexistro Xeral Sanitario de Empresas Alimentarias e Alimentos.

l) Inscripción no Rexistro da Propiedade, en caso de obra nova, ou instalación de bens inscrites.

m) Solicitude ou declaración responsable no rexistro de industrias agrarias ou establecementos industriais.

2. Todos os pagamentos que realice o beneficiario deben realizarse a través dunha conta bancaria única dedicada en exclusiva a este fin.

3. O máis tardar o 30 de abril do ano en que conclúa o proxecto, o beneficiario solicitará o pagamento do saldo da axuda, e entregará a documentación xustificativa ante o órgano competente da comunidade autónoma.

4. O pagamento da axuda estará subordinado á presentación das contas xustificativas do investimento, verificadas por un auditor de contas ou sociedade de auditoría inscritos no Rexistro Oficial de Auditores de Contas ou, na súa falta, á verificación por parte da comunidade autónoma das facturas e documentos mencionados anteriormente; esta comprobación incluírá, como mínimo, unha inspección *in situ* para cada expediente de axuda.

5. Se se comprobar nos controis que non se cumpriu o obxectivo do proxecto de investimento ou que non se executou como mínimo o 70 por cento do orzamento de investimento aprobado, en ambos os casos por causas diferentes ás de forza maior ou circunstancias excepcionais, que deberán estar adecuadamente xustificadas polo receptor da axuda e aceptadas pola autoridade competente, exixirase o reintegro das cantidades aboadas e executarase a garantía de boa execución.

6. Soamente poderá estimarse favorablemente unha solicitude de pagamento cando quede acreditada a situación do beneficiario respecto das súas obrigacións tributarias e fronte á Seguridade Social.

7. O beneficiario terá dereito á axuda unha vez que se confirme que se realizaron e comprobaron sobre o terreo unha ou varias das operacións previstas na solicitude aprobada, excepto nos casos de forza maior ou circunstancias excepcionais na acepción do artigo 31 do Regulamento (CE) n.º 73/2009 do Consello, do 19 de xaneiro de 2009.

8. A comunidade autónoma realizará os pagamentos após a recepción completa da solicitude de pagamento, antes do 15 de setembro do exercicio Feaga.

Artigo 58. *Liberación de garantías.*

1. A garantía de boa execución terá validez até o momento do pagamento do saldo e liberarase cando a autoridade competente acorde a súa cancelación, logo da comprobación administrativa e sobre o terreo da realización do proxecto de investimento e a execución de, ao menos, o 70 por cento do orzamento aceptado en investimentos considerados operativos.

2. A garantía do anticipo liberarase cando a comunidade autónoma recoñeza o dereito definitivo a percibir a axuda de conformidade co previsto no artigo 19 do Regulamento (CE) n.º 555 /2008 da Comisión, do 27 de xuño de 2008.

Artigo 59. *Avaliación e seguimento da medida.*

1. O Ministerio de Agricultura, Alimentación e Medio Ambiente trocará información, por vía electrónica, coas comunidades autónomas e co sector para garantir o seguimento da medida e promover o seu correcto funcionamento.

2. As comunidades autónomas elaborarán un informe anual do resultado dos proxectos de investimento e controis efectuados, que se enviará antes do 1 de novembro ao Ministerio de Agricultura, Alimentación e Medio Ambiente.

O Ministerio de Agricultura, Alimentación e Medio Ambiente, coa información facilitada polas comunidades autónomas, realizará anualmente un informe xeral de avaliación da medida, xuntando, se for o caso, propostas de modificación.

CAPÍTULO III

Control e pagamento das axudas

Artigo 60. *Controis.*

1. As actuacións de control serán realizadas conforme o establecido na normativa comunitaria aplicable e no presente real decreto. No que se refire á medida de reestruturación e reconversión de viña, aplicarase especialmente o recollido no artigo 81 do Regulamento (CE) n.º 555/2008 da Comisión, do 27 de xuño de 2008. Para as medidas de investimento, observarase o previsto no capítulo I e II do título V do Regulamento (CE) n.º 555/2008 da Comisión, do 27 de xuño de 2008, no que sexa de aplicación.

2. As comunidades autónomas articularán as medidas de control necesarias para garantir o cumprimento das actuacións previstas nun plan xeral de control elaborado polo Fondo Español de Garantía Agraria en coordinación con elas. No caso da reestruturación e reconversión de viña, o plan xeral citado terá en conta o rexistro vitícola da comunidade autónoma correspondente.

3. Como complemento ao plan xeral de control que se estableza, as autoridades competentes poderán desenvolver cantas actuacións de control consideren precisas.

4. Para aquelas axudas relacionadas coa superficie, os controis administrativos e sobre o terreo estableceranse tendo en conta os principios xerais do sistema integrado de xestión e control previstos no título II, capítulo 4, do Regulamento (CE) n.º 73/2009 do Consello, do 19 de xaneiro.

Artigo 61. *Pagamento.*

O outorgamento e pagamento ou denegación das axudas a que se refire este real decreto corresponde á autoridade competente da comunidade autónoma onde se presente a axuda.

As axudas reguladas neste real decreto financiaranse con cargo ao Fondo Europeo Agrícola de Garantía.

Artigo 62. *Pagamentos indebidos e sancións.*

1. O beneficiario deberá reintegrar os pagamentos indebidos xunto cos xuros, segundo o establecido no artigo 97 do Regulamento (CE) n.º 555/2008 da Comisión, do 27 de xuño de 2008. O tipo de xuro que se aplique será o de demora establecido na correspondente Lei de orzamentos xerais do Estado.

2. O incumprimento do disposto neste real decreto será sancionado, logo de instrución do procedemento sancionador, segundo o disposto nos artigos 37 a 45 da Lei 24/2003, do 10 de xullo, e nos artigos 52 a 69 da Lei 38/2003, do 17 de novembro.

Artigo 63. *Compatibilidade das axudas.*

Non se financiarán cos fondos do Programa nacional de apoio as medidas que están recollidas nos programas de desenvolvemento rural ao abeiro do Regulamento (CE) n.º 1698/2005 do Consello, do 20 de setembro de 2005, relativo á axuda ao desenvolvemento rural, e as operacións de información e de promoción de produtos agrícolas no mercado interior e en terceiros países recollidas no número 3 do artigo 2 do

Regulamento (CE) n.º 3/2008 do Consello, do 17 de decembro de 2007. Non obstante, para a medida de investimentos e segundo o establecido no artigo 54.1, os compromisos de investimento aprobados desde o 1 de xullo de 2014 para os produtos mencionados no anexo XI ter do citado Regulamento (CE) n.º 1234/2007 do Consello, do 22 de outubro de 2007, deberánse financiar exclusivamente cos fondos do Programa de apoio ao sector vitivinícola español.

En ningún caso estas axudas poderán ser acumuladas ou completadas con outras axudas nacionais ou das comunidades autónomas dedicadas á mesma finalidade.

Disposición adicional única. *Medios.*

A constitución e funcionamento da Comisión prevista no artigo 10, e do Comité regulado no artigo 19, non suporán incremento de gasto e serán atendidos cos medios persoais e materiais existentes no Dirección Xeral da Industria Alimentaria do Ministerio de Agricultura, Alimentación e Medio Ambiente.

Disposición transitoria primeira. *Reestruturación e reconversión de viña.*

Respecto da reestruturación e reconversión de viña, aboaranse con cargo aos exercicios 2014 a 2018 as medidas finalizadas antes do 31 de xullo de 2013 e que non puideron ser pagadas antes do 15 de outubro de 2013, para o cal os requisitos e condicións serán os establecidos no Real decreto 244/2009, do 27 de febreiro, para a aplicación das medidas do Programa de apoio ao sector vitivinícola español.

As medidas iniciadas e non finalizadas en 31 de xullo de 2013 serán liquidadas ou pagadas con cargo aos exercicios 2014 a 2018, conforme os importes e operacións recollidos no anexo XII do presente real decreto. As comunidades autónomas poderán determinar que sexan executadas conforme os requisitos e condicións previstos neste real decreto.

Nos casos descritos nos dous parágrafos anteriores, a contribución comunitaria para os custos de reestruturación e reconversión de viña non poderá exceder o 75 % nas rexións de converxencia segundo a clasificación do Regulamento (CE) n.º 1083/2006 e do 50 % no resto de rexións.

Disposición transitoria segunda. *Promoción en mercados de terceiros países.*

Non obstante o previsto na disposición derogatoria, para as solicitudes das axudas á promoción en mercados de terceiros países presentadas no ano 2013 será de aplicación a sección 1.ª do capítulo II e o capítulo III do Real decreto 244/2009, do 27 de febreiro.

Disposición derogatoria. *Derrogación normativa.*

Quedan derrogados o Real decreto 244/2009, do 27 de febreiro, para a aplicación das medidas do programa de apoio ao sector vitivinícola español, e o Real decreto 1547/2011, do 31 de outubro, polo que se regula a medida de investimentos recollida no Programa de apoio ao sector vitivinícola.

Disposición derradeira primeira. *Título competencial.*

Este real decreto dítase ao abeiro do disposto no artigo 149.1.13.ª da Constitución, que atribúe ao Estado a competencia exclusiva en materia de bases e coordinación da planificación xeral da actividade económica, salvo a sección primeira do capítulo II, que se dita ao abeiro do disposto no artigo 149.1.10.ª da Constitución, que atribúe ao Estado a competencia exclusiva en materia de comercio exterior.

Disposición derradeira segunda. *Facultade de modificación.*

Facúltase o ministro de Agricultura, Alimentación e Medio Ambiente para modificar tanto os importes a que se fai referencia no artigo 32 como os anexos do presente real decreto cando esas modificacións sexan exixidas como consecuencia da normativa da Unión Europea. Ademais, poderá modificar as datas e prazos contidos na presente disposición.

Disposición derradeira terceira. *Deber de información.*

O Ministerio de Agricultura, Alimentación e Medio Ambiente e as comunidades autónomas proporcionaranse, preferentemente por vía electrónica, a información necesaria para facilitar o seguimento das disposicións contidas neste real decreto.

Disposición derradeira cuarta. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 19 de xullo de 2013.

JUAN CARLOS R.

O ministro de Agricultura, Alimentación e Medio Ambiente,
MIGUEL ARIAS CAÑETE

ANEXO I

Accións e actividades de promoción

Accións	Actividades
a) Relacións públicas e medidas de promoción e publicidade que destaquen, en particular, as vantaxes dos produtos comunitarios en termos de calidade, seguranza alimentaria e respecto polo ambiente.	Misións comerciais. Campañas publicitarias de natureza diversa (TV, radio, prensa, eventos, etc.). Promocións en puntos de venda. Portais web para promoción exterior. Misións inversas. Oficinas de información. Gabinete de prensa. Presentacións de produto.
b) Participación en manifestacións, feiras e exposicións de importancia internacional.	Feiras e exposicións internacionais, etc., sectoriais ou xerais, profesionais e de consumidores.
c) Campañas de información, en particular sobre os sistemas comunitarios de denominacións de orixe, indicacións xeográficas e produción ecolóxica.	Encontros empresariais, profesionais, líderes de opinión e consumidores. Xornadas, seminarios, catas, degustacións, etc.
d) Estudos de novos mercados, necesarios para a busca de novas saídas comerciais.	Estudos e informes de mercado.
e) Avaliación dos resultados das medidas de promoción e información.	Estudos de avaliación de resultados das medidas de promoción. Auditorías de execución de medidas e gastos das operacións.

ANEXO II

Lista de produtos

Os produtos mencionados no artigo 6 son os seguintes:

1. Viño.
2. Viño de licor.
3. Viño espumoso.
4. Viño espumoso de calidade.
5. Viño espumoso aromático de calidade.
6. Viño de agulla.
7. Viño de agulla gasificado.
8. Viño de uvas pasificadas.
9. Viño de uvas sobremaduras.
10. Viños ecolóxicos.

ANEXO III

Lista de países prioritarios

Países incluídos nos plans integrais de desenvolvemento de mercados da Secretaría de Estado de Comercio:

- a) Alxeria.
- b) Australia.
- c) Brasil.
- d) China.
- e) Corea do Sur.
- f) Estados Unidos.

- g) India.
- h) Indonesia.
- i) Xapón.
- j) Marrocos.
- k) México.
- l) Rusia.
- m) Singapur.
- n) Sudáfrica.
- o) Turquía.
- p) Países do Golfo (Arabia Saudita, Kuwait, Bahrein, Qatar, EAU, Omán).

Outros países:

- a) Canadá.
- b) Noruega.
- c) Suíza.

ANEXO IV

I. *Formulario de beneficiario*

Cubrir un único formulario por beneficiario.

1 Beneficiario.

1.1 Presentación.

Nome, enderezo, enderezo de correo electrónico, teléfono, fax, persoa de contacto responsable do programa.

1.2 Tipo de beneficiario (de acordo co artigo 5 do presente real decreto).

1.3 ¿Trátase dun novo beneficiario? SI/NON.

1.4 Características da organización ou empresa proponentes.

Representatividade, importancia no sector.

1.5 Tamaño da empresa.

Especificar se se trata dunha microempresa ou pequena e mediana empresa.

1.6 ¿Trátase dunha empresa/grupo empresarial SI/NON.

En caso afirmativo, especifíquese cales son as adegas do grupo que participan no programa.

2. Acreditación da capacidade financeira.

2.1 Balance de contas.

Copia das declaracións financeiras e/ou informes anuais dos 3 últimos anos.

3 Acreditación da capacidade técnica.

3.1 Descrición dos recursos para a execución do programa (persoal e medios)

Especifíquese se os recursos son propios ou alleos.

Se se seleccionaron varios organismos de execución, indíquense as actuacións que aplicarán cada un deles.

3.2 Xustificación da capacidade para executar o programa (experiencia en actuacións de promoción).

4. Capacidade de resposta comercial.

4.1 Volume de comercialización para posible resposta comercial.

4.2 Diversidade de tipos de viño e zonas xeográficas en que está presente.

II. *Formulario de programa*

Cubrir un formulario para cada programa.

1 Características do programa.

1.1 Produto(s).

1.2 Mercado(s) destinatario(s).

Especifíquense os países de destino e detalle os motivos polos cales foron seleccionados.

1.3 ¿Trátase dun programa dirixido a un novo destino? SI/NON.

En caso afirmativo, especifíquese o novo(s) país(es) de destino.

1.4 Duración: 12-24-36 meses.

1.5 ¿É continuación dun programa presentado no exercicio anterior? SI/NON.

1.6 ¿Trátase dunha prorroga? SI/NON.

2 Obxectivo.

En termos de obxectivos concretos e, se for posible, cuantificados.

3 Estratexia.

Especifíquese que instrumentos de márketing e comunicación se utilizarán para o alcanzar os obxectivos do programa.

4 Accións.

4.1 Descrición detallada de cada unha das accións e actividades por país.

4.2 Calendario previsto.

Lugares e datas onde se levarán a cabo as actividades (menciónese a cidade ou, en casos excepcionais, a rexión; por exemplo, «os Estados Unidos» non é suficientemente preciso).

5 Público obxectivo.

Especificar se vai dirixido a consumidor, a distribuidores (supermercados, grosistas, retallistas especializados, fornecedores, restaurantes) a importadores, a líderes de opinión (xornalistas e expertos gastronómicos), a escolas de gastronomía e restauración, ...

6 Mensaxes.

Sobre as calidades intrínsecas dos produtos ou, en caso de se tratar de viños que contan cunha indicación xeográfica, a orixe do produto.

7 Repercusión previsible.

Polo que se refire á evolución da demanda, a notoriedade e a imaxe do produto ou calquera outro aspecto vinculado aos obxectivos.

7.1 Especificíquese e cuantifíquese a repercusión previsible en termos de resultados.
7.2 Especificíquese o método cuantitativo e/ou cualitativo que se utilizará para medir os resultados ou repercusións.

8 Interese nacional e comunitario do programa.
9 Orzamento.

9.1 Cadro recapitulativo.

Elaborar un cadro recapitulativo para cada país de destino e exercicio.

A presentación do orzamento debe aterse á mesma estrutura e á mesma orde que a descrición das actividades. Véxase o modelo adxunto.

10 Plan de financiamento.

Véxase o cadro modelo adxunto.

11 Outros datos pertinentes.

Anexos obrigatorios

Anexo I. Compromiso da organización ou empresa propoñentes de garantir o seu financiamento para toda a duración do programa.

Anexo II. Declaración da organización ou empresa propoñentes de que o programa non recibe ningunha outra axuda económica da UE.

III. Orzamento

Orzamento recapitulativo:

Acción	Actividades	Exercicio I Anualidade I	Exercicio II Anualidade II	Exercicio III Anualidade III	Total
a)					
b)					
c)					
d)					
e)					
Total					

Plan de financiamento €:

Cofinanciamento	Exercicio I	%	Exercicio II	%	Exercicio III	%	Total	%
UE.		50		50		50		50
Propoñente.		50		50		50		50
Total.		100		100		100		100

ANEXO V

Criterios de avaliación

	Puntuación máxima
1. Características do propoñente:	
a) Representatividade do propoñente.	5 puntos
b) Microempresas e pequenas e medianas empresas.	10 puntos
c) Programas presentados por novos beneficiarios ou que teñan como obxectivo un novo país. ...	10 puntos

1. Subtotal	25 puntos
2. Calidade e eficacia do programa:	
a) Produtos obxecto de promoción	5 puntos
b) Mercado de destino	5 puntos
c) Duración do programa	5 puntos
d) Presentación e calidade do programa	10 puntos
e) Alcance e cobertura do programa	10 puntos
f) Coherencia entre os obxectivos, as actividades e as canles de información	10 puntos
g) Método para medir a repercusión do programa	5 puntos
h) Relación calidade/prezo	15 puntos
2. Subtotal	65 puntos
3. Interese para a comunidade autónoma:	
Criterio á escolla de cada comunidade autónoma	10 puntos
3. Subtotal	10 puntos
Valoración total xeral	100 puntos

1. Características do propoñente

a) Representatividade do propoñente: en función da importancia da empresa ou do colectivo

- 3 puntos segundo as denominacións de orixe protexidas e as indicacións xeográficas protexidas que representan e os produtos (tipos de viño) e ámbito xeográfico que abrangue.

- 2 preferencia polas marcas colectivas

b) Microempresas e pequenas e medianas empresas: segundo se definen na Recomendación 2003/361/CE da Comisión, do 6 de maio de 2003, sobre a definición de microempresas, pequenas e medianas empresas.

c) Programas presentados por novos beneficiarios ou que teñan como obxectivo un novo país: a puntuación repartirase de forma proporcional á porcentaxe de orzamento destinado a novos países, correspondendo os 10 puntos soamente aos programas en que estes destinos supoñan o 100 % do orzamento.

2. Calidade e eficacia do programa

a) Produtos obxecto de promoción:

Os 5 puntos repartiranse en función da amplitude e diversidade da carteira de produtos, e do valor engadido do produto (tanto en prezo, como en adaptación ao mercado de destino).

b) Mercado de destino:

Os 5 puntos repartiranse segundo o mercado elixido. Concederanse 5 puntos para os mercados considerados prioritarios e 2 puntos se o mercado de destino non se encontra entre os prioritarios detallados no anexo III.

A repartición farase de forma proporcional á porcentaxe de orzamento destinado aos países prioritarios e os 5 puntos corresponderán soamente aos programas en que estes destinos supoñan o 100% do orzamento.

c) Duración dos programas:

No caso de programas plurianuais, concederanse os 5 puntos aos programas cuxa duración sexa ao menos de 24 meses.

No caso de programas anuais concederanse os 5 puntos se son continuación dun programa presentado no exercicio anterior que fose executado correctamente.

d) Presentación e calidade do programa:

Para valorar esta epígrafe terase en conta o grao de concreción e detalle dos diferentes aspectos do programa, en especial, o obxectivo que se persegue, as actividades, calidade das mensaxes (existencia de creatividade), grupo destinatario, medios para desenvolver o programa (a través dunha axencia), calendario de actividades.

e) Alcance e cobertura do programa:

A puntuación concederase da seguinte forma:

- 2,5 puntos en función do alcance e cobertura en termos de accións previstas.
- 2,5 puntos en función do alcance e cobertura en termos de grupo destinatario (número de contactos previstos, etc.).
- 5 puntos en función do alcance previsto en termos de notoriedade e repercusión económica dos cales:

- 2,5 puntos para valorar a notoriedade prevista. Teranse en conta as actividades incluídas no programa que van dirixidas a aumentar a notoriedade, entre outras, medios (TV, radio, internet, redes sociais...) feiras, ...

- 2,5 puntos para valorar a posible repercusión económica. Teranse en conta as previsións canto a incrementos de vendas...

f) Coherencia entre os obxectivos, as actividades e as canles de información.

Valorarase a adecuación das actividades e canles elixidas para o cumprimento dos obxectivos marcados

g) Método para medir a repercusión.

A asignación dos 5 puntos realizarase da seguinte maneira:

- 5 puntos se existe un método de avaliación descrito e coherente co obxectivo que se vai avaliar.

- 3 puntos se existe un método descrito pero non totalmente adecuado ao obxectivo que se vai valorar.

- 0 puntos se existe un método descrito pero non se adecua ao obxectivo que se vai valorar ou se non existe método para valorar a repercusión.

h) Relación calidade/prezo:

- 5 puntos para repartir en función da adecuación dos custos do programa aos prezos de mercado.

- 10 puntos para repartir segundo o importe resultante de dividir o custo da acción proposta e o incremento previsible das súas vendas (ou outros indicadores de repercusión do programa).

ANEXO VII

Condicións para a subvencionabilidade dos custos de persoal e gastos xerais

Para resultaren subvencionables estes gastos, deberán cumprir cos seguintes requisitos:

a) Custos de persoal da empresa dedicado en exclusiva ás actividades de promoción: deberán demostrar a relación contractual coa empresa, mediante os datos do contrato e cotización á Seguridade Social a cargo da empresa. Tanto se é persoal técnico como administrativo, deberase demostrar a dedicación en exclusiva ás actividades de promoción establecidas no programa aprobado.

b) Custos de persoal da empresa non dedicado en exclusiva ás actividades de promoción: deberán demostrar a relación contractual coa empresa mediante os datos do contrato e cotización á Seguridade Social. Ademais, deberán presentar as correspondentes táboas horarias onde se indique a categoría profesional, o número de horas de dedicación, o custo horario e o custo total, ben como unha certificación do responsable de persoal da empresa que probe a relación do traballador co programa aprobado. Avaliarase a coherencia das citadas táboas co programa e subvencionarase unicamente o importe xustificado mediante esas táboas.

c) Gastos xerais: serán subvencionables os custos do beneficiario até un límite dun 4 por cento dos custos efectivos de execución das actividades promocionais. Estes gastos, para seren subvencionables, deberán estar considerados como unha partida específica no orzamento recapitulativo do programa. Xustificaranse mediante un certificado do beneficiario que demostre eses gastos de administración e xestión do programa aprobado.

ANEXO VIII

Relación de gastos non subvencionables

- Provisións para futuras posibles perdas ou débedas.
- Gastos de transporte en taxi ou transporte público, cubertos polas axudas de custos diarias.
 - Gastos bancarios, xuros bancarios ou primas das pólizas de seguros.
 - Perdas por troco de divisas.
 - No caso de que se repita ou solicite unha prórroga para realizar o programa de promoción no mesmo país, non se poderán incluír gastos de actividades promocionais xa solicitadas no programa anterior (ex. custos de creación de páxinas web, anuncios de TV e radio, elaboración de material audiovisual, estudos de mercado, etc.).
 - Gastos que estean fóra do obxecto do programa.
 - Creación e rexistro de marcas.
 - Tampouco poderán considerarse subvencionables gastos equivalentes a descontos comerciais nin os asimilables a axudas directas ao produtor.

ANEXO IX

Necesidades de financiamento para a reestruturación e reconversión de viña para o exercicio orzamentario: 20.....

Comunidade autónoma:

Data de comunicación:

Superficie afectada (ha)	Importe total (€)

Comunicación de acordo co número 1 do artigo 28 do presente real decreto.

ANEXO X**Pagamentos de reestruturación e reconversión**

Comunidade autónoma:

Data de comunicación:

Superficie afectada (ha)	Importe total (€)

Comunicación de acordo co número 1 do artigo 30 do presente real decreto.

ANEXO XI**Previsións de gasto de reestruturación e reconversión até o 15 de outubro***Previsións de gastos até o 15 de outubro*

Comunidade autónoma:

Data de comunicación:

Superficie afectada (ha)	Importe total (€)

Comunicación de acordo co número 2 do artigo 30 do presente real decreto.

ANEXO XII

Operacións subvencionables en reestruturación e reconversión de viña

Operación	Importe máximo subvencionable
A) Reimplantación de viñas.	
1. Arrinca (incluída a recolla de cepas)	430 €/ha
2. Preparación do solo	1.400 €/ha
3. Preparación do solo para a plantación en covas («hoyos») na Illa de Lanzarote ¹ ..	4.200 €/ha
4. Preparación do solo para a plantación en gabias (“zanjas”) na Illa de Lanzarote ² ..	2.350 €/ha
5. Reposición cinza volcánica («picón») ³	5.100 €/ha
6. Desinfección	2.000 €/ha
7. Eliminación de pedras	400 €/ha
8. Nivelación do terreo	800 €/ha
9. Socalcamento	19.000 €/ha
10. Socalcamento con muras de pedra en pendentes maiores do 30%	30.000 €/ha
11. Planta e plantación	1,69 €/planta
12. Protección individual de plantas contra coellos no momento da plantación (incluída a colocación)	0,5 €/unidade
13. Sistemas de condución (incluída colocación)	
13.1 Espaller	3.400 €/ha
13.2 Estacada	5.000 €/ha
13.3 Parra ou similares	15.000 €/ha
13.4 Parra baixa Canarias	8.300 €/ha
13.5 Elevación individualizada ⁴	1€/unidade
B) Reconversión de viñas.	
14. Sobreexertía	0,9 €/unidade
C) Mellora de técnicas de xestión de viñas.	
15. Cambio de vaso a espaller ou a outro sistema de condución	600 €/ha + sistema de condución

¹ É excluínte coa operación de preparación do solo.

² É excluínte coa operación de preparación do solo.

³ Operación ligada exclusivamente a operacións 3 e 4.

⁴ Exclusivamente Comunidade Autónoma de Galicia e País Vasco.

ANEXO XIV

Modelo de solicitude de axuda á destilación de subprodutos

DESTILADOR (Cubrir ou pór etiquetas)	PRODUTOR (Cubrir ou pór etiquetas)
APELIDOS E NOME E/OU RAZÓN SOCIAL	APELIDOS E NOME E/OU RAZÓN SOCIAL
NIF	NIF
RÚA	R.I.A
LOCALIDADE e/ou MUNICIPIO	RÚA
PROVINCIA	LOCALIDADE e/ou MUNICIPIO.....
C.P.	PROVINCIA
CÓDIGO DESTILADOR	C.P
	ADEGA (de elaboración)
	N.I.D.P.B
	ZONA VITÍCOLA

D.....con NIF..... en calidade dedo destilador indicado realizou a destilación de subprodutos do artigo 103 terxios do Regulamento (CE) nº 1234/2007 do Consello, correspondente ao produtor identificado no cadro superior, que entregou para a súa destilación os produtos que se xustifican na relación que se xunta, e dos cales se obtivo o alcohol que se detalla no cadro inferior.

Por todo o cal

SOLICITA:

A) Percibir a axuda que lle poida corresponder para as citadas cantidades de alcohol obtido da destilación indicada, unha vez realizada a destilación conforme o regulamentariamente establecido, comprometéndose a comunicar e xustificar o destino do citado alcohol e a proceder ao reintegro da axuda cos correspondentes xuros se este non se utilizar exclusivamente con fins industriais ou enerxéticos, ingresándoos na conta e entidade que se indica máis adiante.

B) Que se lle aboe o importe correspondente ao anticipo previsto (60% do importe inicial da axuda) pola destilación realizada.

En..... de..... de.....
Polo destilador,

Asdo.:

SR. DIRECTOR XERAL.....

ANEXO XV

Actuacións admisibles na medida de investimentos

A) *Producción e comercialización*

1. Elaboración de produtos vitivinícolas: as operacións propias do proceso de elaboración, desde a recepción da uva até o almacenamento do produto terminado, incluíndo os sistemas informáticos para o control dos procesos produtivos.

2. Control da calidade: calquera operación realizada no proceso de control da calidade dos produtos, desde a toma de mostras na recepción da uva na adega, os controis realizados durante o proceso da elaboración, o aseguramento da rastrexabilidade, os sistemas de calidade ou a implantación de normas de calidade alimentaria.

3. Vinculadas á empresa en xeral: as operacións que melloren a estrutura operativa dos sistemas de xestión administrativa, a organización e o control da empresa, ben como o desenvolvemento das redes de información e comunicación.

4. Comercialización: calquera operación realizada nos países da UE, incluída España, en:

- a) puntos de venda directa na adega, incluíndo salas de exposición e degustación, pero separados fisicamente das instalacións de elaboración.
- b) puntos de venda fóra da adega, almacéns, centros loxísticos e oficinas comerciais
- c) equipamentos necesarios para a exposición e/ou venda
- d) desenvolvemento de redes de comercialización
- e) hardware, software, plataformas web/comercio electrónico, para a adopción de tecnoloxías da información e a comunicación (TIC) e o comercio electrónico.

B) *Desenvolvemento de novos produtos, procedementos e tecnoloxías*

Os gastos auxiliares para o desenvolvemento de novos produtos, procedementos e tecnoloxías corresponderán a actividades preparatorias tales como o deseño, o desenvolvemento e ensaio e as operacións tanxibles ou intanxibles relacionadas con elas, antes do seu emprego con fins comerciais.

ANEXO XVI

Gastos non considerados subvencionables

1. Os gastos de constitución e primeiro establecemento.

2. A compra de terreos e os gastos relacionados con ela (honorarios de notario, impostos e similares).

3. A compra de edificios que vaian ser derrubados. Se a compra dun edificio é obxecto de axuda, o valor do terreo construído e o do que rodea o edificio, valorado por un técnico competente, non se considera subvencionable.

4. A compra de edificios ou locais se foron subvencionados nos últimos dez anos. Para isto xuntarase unha declaración das subvencións recibidas polo edificio ou o local durante os últimos dez anos. Tampouco serán subvencionables os investimentos en reformas de locais que fosen subvencionados anteriormente polas administracións públicas se non transcorreron cinco anos desde a súa finalización.

5. Traballos ou investimentos comezados ou realizados, salvo os seguintes anteriores a un ano da data de solicitude:

- a) Honorarios técnicos, gastos de estudos de viabilidade económica, técnica, xeotectónica, de mercado, e similares, a adquisición de patentes e licenzas, e gastos relacionados cos permisos e seguros de construción. Non terán a consideración de gastos auxiliares as taxas ou outros impostos.

b) Arrecadación de materiais de construción e encarga ou compra de maquinaria, mesmo a subministración, pero non a montaxe, instalación e proba.

6. Obras de ornamentación e equipamentos de lecer salvo nos investimentos en que se prevexan actividades de comercialización, caso este en que son financiados os gastos previstos con fins didácticos ou comerciais (salas de cata, salas de proxección, televisores, vídeos, catálogos e similares).

7. A compra de material amortizable normalmente nun ano (botellas, embalaxes, material funxible de laboratorio e similares). As tarimas, caixóns-tarima e caixas de campo teñen unha duración de vida superior a un ano e son, por tanto, auxiliares, a condición de que se trate dunha primeira adquisición ou dunha adquisición suplementaria, proporcional a unha ampliación prevista, e de que non sexan vendidos coa mercadoría.

8. Os investimentos que figuren na contabilidade como gastos.

9. A compra e instalación de maquinaria e equipamentos de segunda man.

10. Os gastos relativos ao traslado de maquinaria xa existente até o local ou sitio en que se vai realizar o proxecto.

11. As reparacións e obras de mantemento. Non teñen a consideración de reparacións as operacións realizadas sobre maquinaria instalada para ampliar a súa capacidade ou mellorar as súas prestacións.

12. O imposto do valor engadido (IVE) ou calquera outro imposto recuperable polo beneficiario.

13. As edificacións destinadas a vivenda.

14. Vehículos, salvo os de transporte interno nas instalacións.

15. Os gastos de aluguer de equipamentos de produción e os investimentos financiados mediante arrendamento financeiro.

16. A man de obra propia e os materiais de igual procedencia.

17. Os gastos por transaccións financeiras, xuros debedores ou de demora, as comisións por troco de divisas e as perdas, así como outros gastos puramente financeiros.

18. As multas, sancións financeiras e gastos de procedementos legais.

Outros investimentos non auxiliares

1. Na elaboración de viños protexidos por algunha figura de calidade non serán subvencionables os depósitos, a maquinaria ou as instalacións que non contribúan á obtención de produtos de calidade, tales como:

— As prensas coñecidas como continuas, nas cales a presión é exercida por un parafuso de Arquímedes no seu avance sobre un contrapeso.

— As máquinas de pisar de acción centrífuga, de eixe vertical.

— As prácticas de prequentamento da uva ou quentamento dos mostos ou dos viños en presenza de bagazos tendentes a forzar a extracción de materia corante.

2. A compra de cubas, salvo que sexan de nova adquisición ou supoñan un aumento do parque de cubas por incremento da capacidade da adega.

3. A construción ou adquisición de depósitos non revestidos de material inerte.

ANEXO XVII

Criterios de valoración	Puntuación máxima
1. Características do solicitante:	
1.1 Pequena e mediana empresa	5 puntos
1.2 Muller ou mozo agricultor	2 puntos
1.3 SAT ou cooperativa menor de 150 socios	3 puntos
1.4 Cooperativa maior de 150 socios	4 puntos
1.5. Cooperativa de 1.º grao maior de 250 socios e resultante dun proceso de fusión nos dous últimos anos anteriores á solicitude	5 puntos
1.6 Cooperativa acollida á Orde APA/180/2008, do 22 de xaneiro	6 puntos
1. Subtotal	25 puntos
2. Calidade e eficacia do proxecto:	
2.1 Ao menos o 50% do custo do investimento realízase con fondos propios	5 puntos
2.2 O solicitante pertence a unha DOP/IXP ou outra figura de calidade recoñecida	5 puntos
2.3 Proxecto do investimento destinado á transformación e comercialización da produción propia do solicitante	10 puntos
2.4 Creación de emprego neto respecto á media dos 3 anos anteriores	5 puntos
2.5 Nivel de capacitación e profesionalización (incorporación de enólogo ou técnico equivalente)	2 puntos
2.6 O solicitante dispón de certificación de aseguramento da calidade (BRC;IFS, ISO 9000) ou ambiental	3 puntos
2. Subtotal	30 puntos
3. Características do proxecto:	
3.1 O transformador mantén vínculo contractual cos vitivinicultores	5 puntos
3.2 O investimento realízase en territorio insular	3 puntos
3.3 Implantación internacional e experiencia exportadora	5 puntos
3.4 Estrutura e capacidade técnica propia para a execución do proxecto	5 puntos
3.5 O investimento supón o traslado das instalacións de zona urbana a industrial	7 puntos
3. Subtotal	25 puntos
4. Capacidade de resposta comercial:	
4.1 Disponibilidade de distribución no mercado de destino	5 puntos
4.2 Alcanzar ao menos o 10 por cento de exportación sobre o total de facturación de vendas durante o período de durabilidade do investimento	5 puntos
4.3 Incrementar ao menos un 10 por cento do volume de vendas en produto embotellado/envasado durante o período de durabilidade do investimento	10 puntos
4. Subtotal	20 puntos
TOTAL	100 puntos
5. Índices correctores (aplicanse sobre o total):	
5.1 Se o proxecto inclúe produción, transformación e comercialización	Total x 1,10
5.2 Se o proxecto ten por obxectivo a comercialización internacional	Total x 1,20

